

**NATIONAL ASSEMBLY OF
SEYCHELLES**

*Wednesday 18th November,
2020*

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm Onorab bonzour tou telespektater a lekout. E byenveni pou nou sesyon ozordi. Nou sesyon pou konsern prensipalman Kestyon pou Vis-Prezidan e Minis Finans Hassan lo bann size ki ti leve dan diskour Prezidan yer swar.

Lo size kestyon mon ava zis fer en pti remark. Nou'n resevwar plizyer kestyon sorti kot bann Manm e tou kestyon i dan *pipeline*. Les mon ava fer zot rapel ki zot devret soumet zot kestyon atraver *Leader* zot *Caucus* e apre i vin kot Clerk.

Bann kestyon ki ti lo *Order Paper* yer dan sesyon ki nou ti kennsel, i ankor valab si zot ankor anvi met li devan Minis. Alors sa ki mon pe demann zot regarde si zot bezwen reviz *wording* zot kestyon anvi

lenformasyon ki'n deza donneren yer. E silvouple dan lazournen kontakte Madanm Clerk oubyen kontakte zot *Leader Caucus*, pou regarde si zot anvi revize oubyen zot anvi tenir zot kestyon.

E ozordi mon a lafen ler nou termin sesyon avek bann Minis, ler nou *adjourn* nou pou bezwen fer en *ABC meeting* pou prepar *Order Paper* pou Mardi prosen.

I annan plizyer Manm ki'n eksprim dezir pou al lanterman Mr Samuel Jolicoeur, ki osi papa en ansyen Deputy Speaker Lasanble. E sa i enkli mwan osi, mon ti pou kontan al son lanterman. Alor nou pou *adjourn* bomaten apre sesyon Kestyon e apre nou ava fer *ABC meeting*. E apre Manm i ava lib apre midi pou al lanterman.

Avek sa mo mon pou apel Vis-Prezidan ek Minis Finans ek zot delegasyon pou antre dan Lasanble silvouple.

Byenveni Vis-Prezidan e byenveni Minis Hassan, Minis pour Finans Plan Ekonomik e Komers.

E avek zot i annan osi Mr Damien Thesee ki Sekreter Prensipal pou Finans. Avan nou pas nou angaze avek bann Minis, nou pou akord *Leader* Lopozisyon loportinite pou fer en *Statement* lo diskour

Prezidan yer swar e apre nou ava kapab kontinyen avek biznes lo nou *Order Paper*. Onorab Pillay mon ava envit ou.

HON SEBASTIEN PILLAY

Mersi Mr Speaker. Bonzour tou koleg Onorab. Bonzour Mr Vis-Prezidan avek ou delegasyon enkli Minis Hassan. Byenveni dan Lasanble Nasyonal. Bonzour tou Lepep Seselwa ki pe ekout nou oubyen pe swiv nou aryer.

Mr Speaker yer Prezidan Larepiblik ti adres Lasanble Nasyonal e mon kontan ki mon pe ganny loportinite malgre ki nou'n fer en depar *from* serten konvansyon ki nou ti'n etabli ki ler Prezidan i vin dan Lasanble nou *allow* en deba. Me safwasi nou pe vwar ki Lasanble pe swiv en sesyon Kestyon Minis *following* ladres Prezidan.

Me mon krwar ki i mon devwar koman *Leader* Lopozisyon pou adres serten size ki Prezidan in souleve dan son *speech*. Akoz i enportan ki nou ganny diferan lopinyon oubyen nou adres bann size ki'n ganny prezante dan *speech* Prezidan yer devan Lepep Seselwa.

Mr Speaker *speech* Prezidan in kouven diferan tenm ki mon'n sey rezimen. E ki mon

pou koz lo la dan sa letan ki mon annan pou si oule anmenn en pe leklersisman, oubyen pou demann serten kestyon lo serten keksoz ki'n ganny anonse par Prezidan Larepiblik.

Sa bann tenm i enkli respe e patriyotizm, retir politik dan travay. In osi koz lo bann donasyon, lo lekonomi, e la in mansyonn *STC*. In koz lo *IMF* ek son program e in osi fer referans avek sa size *delinking* ki pou en size kestyon devan nou Lasanble, ankor dan en pti moman.

Lo sa size respe Mr Speaker mon krwar i enportan ki koman Seselwa, nou realize ki respe i en valer ki devret ganny enkilke dan en sosyete, e pou ganny respe nou bezwen respe lezot. Mon pou servi legzanp Mr Speaker, kot nou'n vwar reaksyon bokou dimoun otour sa zenn etidyan La Digue e en sirkiler ki ti sorti kot Minister Ledikasyon, kot ti fer referans avek aksyon disipliner sever ki bezwen ganny pran kont sa zenn.

Mon krwar ki tou dimoun ki ti pe montre ledwa anver sa zenn fiy, i devret regard nou lekor dan laglas e analiz ki manner koman *leaders* nou kontribye pou fer ki nou bann zenn i devlop sa kalite

reaksyon, oubyen sa mank respe.

Nou bezwen aksepte ki bokou nou nou'n anmenn en lalit asarnen pou denigre plizyer lofis e lenstitisyon dan pei e sa i fer ki zenerasyon ki pe vini i swiv sa ki nou'n fer.

Par egzamp nou'n *allow* dimoun pandan bann letan kanpanny, pou pil lo portre ansyen Prezidan. Nou'n annan en kanpanny "*Danny Out.*" E nou'n menm les etranze vin met serkey kot Lorloz kot personn pa'n zanmen *deal* ek zot dan en fason sever, oubyen pran aksyon disipliner kont zot.

Sa ki mon pe fer se ki mon pa pe fer referans avek bann keksoz ki'n pase zis pou fer en *score* pwen politik.

Me mon pe plito prezant zot avek lafason ki nou koman *leaders* nou bezwen *from now on* konport nou. Si nou oule ki respe i ganny donnen a tou bann *Leaders*, nou bezwen osi koman *Leaders* ler nou al dan bann aktivite pa denigre lezot *leaders* parey mwan menm mwan mon'n pas atraver, pandan ki Prezidan ti dan en vizit lo La Digue.

Wi, kanpanny in fini so nou bezwen travay pou anmenn respe ansanm. E sel fason ki nou fer li si nou respe kanmarad lamazorite dimoun

pou pran sa ki nou fer koman lafason ki nou devret azir e konport nou. Lo sa size retir politik dan travay, byensir mon siport sa san poursan e i en aksyon ki'n ganny komanse dan *previous administration*.

Pou deservi tou dimoun san met politik ladan. Me selman i pa vedir ki dimoun napa drwa kritike kot i mal. Sa i pa vedir ki dimoun pa pou kapab eksprim zot lekor. Parey serten O Zofisye nouvo Gouvernman ozordi pe komans dir avek serten travayer.

Mr Speaker si i annan en letan kot dimoun in lib pou eksprim zot lekor se sa dernyen 4an. Nou'n dir sa ki nou anvi menm lo Prezidan, lo Minis, lo Speaker Lasanble, lo *MNA*, lo *Leader* Lopozisyon, lo tou dimoun lo *Leader* Zafer Gouvernman menm.

E mon krwar ki la mazorite *MNA* ki ti dan sizyenm Lasanble ki'n retourn dan setyenm Lasanble i ava mazine, ki lafason ki zot ti ganny lenformasyon sete zisteman atraver bann fonksyonner piblik, ki parfwa pa ti dakor avek serten *move* ki Gouvernman pe fer dan zot fonksyon piblik.

Pou nou *deny* sa lavwa e loportinite sa bann dimoun pou eksprim zot lekor anver bann

MNA, oubyen anver lezot dimoun ki ava annan posibilite pou egzers serten *oversight*, oubyen anmenn serten *checks and balance* lo Gouvernman, i kapab danzere pou nou demokrasi.

Mon le *remind* Lasanble ki Lartik 23 i garanti nou *right to assembly and right to association*. Lartik 22 i garanti nou *freedom of expression*. Lartik 27 *the right to equal protection before the Law*.

Si en dimoun i santi en keksoz pa byen demen i ava santi lib pou al met sa konsern devan son *MNA*. E mon prezimen. E mon mazine e mon ti ava swete ki koman en Lasanble nou ava *take Government to task* si i nesese e si konsern sa dimoun i zistifye. Sa i ava vreman montre ki nou pe viv lespri Lartik 40 nou Konstitisyon.

Mr Speaker Prezidan in osi koz lo sa size donasyon. In eksprim gran kontantman oubyen lazwa ki nou pe ganny serten donasyon atraver bann kado ki pou ed nou pei dan sa moman difisil ki nou pe pas ladan.

Me si i annan dikton ki Prezidan li menm ler i ti asiz dann sa sez, kot mon'n asize in fer mwan konpran e ki mon osi mon krwar ladan se ki, tou

donasyon nou bezwen konnen kwa ki vin avek.

Mon asire ki bokou Manm lo lot kote latab, i ava rapel ki nou'n toultan koz lo bann kado anpwazonnen. I nesese ki nou fer sir poudir okenn kado ki nou pe gannyen, pa vin avek lezot *strings attached* parey ki nou dir. E ki dan sa prosis i ava annan latransparans pou nou konnen, egzakteman kote sa bann kado i ale.

Mon kontan ki zabitan La Digue pe ganny tou latansyon an sa ki konsern zot lopital. Mon ti ava swete an relasyon ek sa donasyon ki nou les lespri demokratik pran plas, e *allow* zabitan pou osi eksprim zot anver lafason ki sa donasyon i ava ganny servi dan zot distrik.

Mon krwar se sa ki anim nou Konstitisyon e se sa ki anim nou koman en Nasyon. Nou en pep ki kontan koze e ler nou koze nou ti ava kontan *at least* nou lavwa i ganny tande.

En lot pwen Mr Speaker lo sa zafer donasyon se sa zafer en don anonim pou pey bann vaksen. Ankor enn fwa Mr Speaker, mon konnen ki bann Manm lo lot kote latab pou siport mwan, ler nou dir ki nou *welcome* tou donasyon, me sa zafer anonimite parfwa nou bezwen konnen klerman kote i vini e kote i pe ale.

I kapab apre ki nou'n dekouver ki nou'n ganny en don anonim *from someone*, en lot dimoun demen i vini i reklanmen ki sa dimoun ki fer nou sa donn anonim i en lot, i annan en lot zafer asosye avek sa.

Nou tou nou ava rapel sityasyon ki ti arive ler nou ti annan sa msye, ki ti dir in *buy* bann zofisye Gouvernman Sesel pou en *coconut*.

E lafason ki lo lot kote lataf pandan letan ki zot ti anmenn zot kanpanny zot ti servi sa. So mon ti ava swete ki listwar i permet nou pou rapel nou bann aksyon resan, e nou anim sa ki fer nou Manm Lasanble. E sa se pour toultan annan en *checks and balance* lo sa ki pe pase e pou demann leklersisman.

Koman *Chairman FPAC*, mon pa pou onor sa langazman ki mon fer ek sa Lasanble si mon pa dir sa ki mon pe dir ozordi vizavi okenn donasyon. Mr Speaker an plis ki sa Prezidan in koz lo serten mezir ki dapre li ek Gouvernman pou ed nou fer fas avek sa sityasyon ekonomik. Ou ava realize Mr Speaker ki ler mon pe koz lo bann diferan keksoz ki Prezidan in dir, mon pe osi propoz keksoz ki mon krwar i kapab ganny fer dan laliny pou ed Prezidan,

oubyen ed nou pei avans pli devan.

Mon krwar se sa rol Lasanble, e mon ti ava kontan bann Manm lo lot kote lataf i sezi sa ki mon pe dir.

Lo sa size *STC* Mr Speaker, mon krwar ki nou bezwen regard byen kwa ki pe ganny prezante devan nou. Dapre konpran *SSI* in pran en *loan* pou sa propriyete ki nou pe transfer lo *STC*. Sa i vedir ki sa *loan* pou reste e *SSI* pou *still* bezwen pey sa *loan*. Sa i vedir ki Gouvernman pou *still* annan sa det devan li.

Eski dan restriktirasyon sa *loan SSI* pou *incur* bann *additional bank charges*, ki ava fer ki dan plas kout nou pli bonmarse sa mezir pou aktyelman kout nou en pe pli ser?

Akoz ki Gouvernman pa'n konsider en sibvansyon direk ver *STC* ki ti ava pli fasil pli kler e pli bon marse petet dan lonterm. Vis-Prezidan avek Minis Finans i ava kapab eklersi sa pou nou en pe pli byen.

Lo sa size servi *forex* pou aste loto mon konpran i oule *achieve* Mr Speaker. I annan diferan fason ki Gouvernman i kolekte reveni, me i annan serten fason prensipal; premyerman sa i *tax* lo lalkol e

sigaret. Dezyenmman sa i *tax* lo *fuel*. Me osi i annan *duty* ki peye lo lenportasyon bann komodite parey veikil, ki ede Gouvernman pou balans si oule son *balance sheet*. E mon konpran ki Gouvernman sa mezir ki i pe fer se pou *allow* lespas ekonomik pou sa arive.

Me dan sa konteks Gouvernman li menm in *espouse* oubyen in definir en *Policy* kot tou dimoun i bezwen *abide by*. Savedir persepsyon ki nou pe kree se ki si ou annan larzan ou kapab fer en keksoz e si ou napa ou pa kapab fer.

En *Policy* i ganny fer *for the public good*. En *Policy* i ganny fer *for the social good*. E si nou fer *Policy*, nou tou nou devret kapab swiv sa *Policy*. Malgre ki nou pe dir sa pa pou afekte nou rezerv *forex* akoz sa i larzan sa bann dimoun, i pou vedir ki ler ou pe marse dan en gro loto nef, ou frer pa pou pe ganny son 13enm mwan saler.

Mon krwar dan en konteks, dan enn pei kot nou koz lo egalite ti ava meyer ki si nou'n etabli en *Policy* nou swiv sa *Policy* e nou eseye fer sir ki tou dimoun i *abide by* sa *Policy*. Akoz persepsyon ki sa i kapab kree, se ki nou pou de balans lafason ki nou pe transmet irzans sa sityasyon avek nou popilasyon.

Mr Speaker lo sa size *delinking*, mon krwar i kler ki Prezidan i annan en lapros ki son Gouvernman i le pran. E mon ti ava kontan *remind* Prezidan ki parfwa vreman difisil pou anpes politisyen pou fer politik.

Nou pe plas politisyen dan en lofis akote en brans Egzekitiv. Nou pe pran bann let ki pou vin kot Prezidan nou pou anvoy kot sa bann menm politisyen. Me eski dan lafason ki nou'n mazin fer sa kalite sa lapros, nou pa realize poudir sa *MNA* ki li i napa konpetans Egzekitiv pou delivre pou bezwen refer sa let retourn kot swa sa Minis swa sa *CEO*?

Petet ti ava meyer pou nou annan en lot lapros e non pa melanz travay ki Egzekitiv i bezwen fer e travay ki *MNA* i bezwen fer.

Lesansyel pou reste ki se sa *MNA* ki pou bezwen fer *oversight* lo travay ki Egzekitiv pou bezwen fer. I *Policy* Gouvernman i lafason ki Gouvernman i krwar i pou ed li *achieve* son bann *Policy*. Me lesansyel i reste i se ki nou'n sey travay dir dan sa pei pou nou anmenn *delinking*.

Malgre ki zot lot kote latab zot krwar ki nou ler nou ti lot kote latab nou ti anvi *relink far from it*. I toultan meyer pou

ki ou an deor legzekisyon akoz i pli fasil pou ou kapab egzers *oversight* lo sa ki pe arive. E mon krwar se sa lesansyel ki nou pe anmennen ozordi.

Mon dernyen pwen Mr Speaker mon pou koz lo sa size *IMF* ek 13enm mwan. Mr Speaker mon *PNQ* semenn pase ti zisteman pou rod leklersisman lo sa de size, akoz mon santi ki la mazorite Seselwa i konpran rezon e irzans sityasyon ki nou ladan.

Malgre ki annan bokou ti krwar poudir mon pe target Minis Hassan ki ti'n fek antre dan son lofis, *far from it*. Mon kestyon sete pou konnen ki direksyon Gouvernman pe pran, akoz apre tou sa ti en Gouvernman ki'n *campaign* lo en baz ki ler i pou antre dan Gouvernman li i pou kapab fer pli byen ki sa enn ki vin avan.

Se alor dan sa laliny ki mon ti le demande ki bann mezir ki ti pou annan, e tou referans ki mon ti pe target Minis Hassan mon krwar i devret ganny pran dan lespri ki koman *Leader* Lopozisyon dan Lasanble, mon bezwen demann Gouvernman serten kestyon, malgre pa tou dimoun ki pou kontan.

E la fodre ki nou ganny leksplikasyon lo ki bann kondisjonalite sa program ki

IMF pe vin avek. Nou tou konnen Mr Speaker ki *IMF* ler i vin ek en program i egziz serten kondisyon, sa bann kondisyon i nesese pou zot kapab realiz sa program.

Prezidan Ramkalawan in koz lo dimoun pou ganny travay alors kestyon ki nou pe demande, se eski Gouvernman ki pou sey *attempt* pou kree plis lanplwa?

Ki pou arive avek bann program sosyal? Ki mannyer nou pou kapab re-balans nou *balance sheet* si nou pe ankouraz ankor depans dan Gouvernman me *at the same time* entrodwir, en program *IMF*. Ti ava meyer, i ti ava byen si Vis-Prezidan e Minis Finans i eksplik nou ki mannyer sa pou arive.

Sa program *IMF* pou bezwen osi enkorpor bann diferan pozisyon ki nou'n pran oubyen stratezi ki nou'n pran pou *tackle* sa asize *COVID-19* e ki mannyer in afekte lekonomi. Ler nou regarde Mr Speaker Prezidan pa'n koz lo bann diferan mayon. In koz lo zis *FA4GR*. Me i osi annan program *SETS*. I annan program *welfare*. I annan bann *loans to the private sector*. Ti ava bon osi pou konnen ki mannyer sa bann program pou marse akote *FA4GR* e ki

manner Gouvernman pou swa mentenir sa bann program, oubyen revwar zot, oubyen ki bann mezir pou pran?

Nou konnen nou pei i dan en moman difisil, e mon lentansyon koman *Leader* Lopozisyon, se pa pou anpes Gouvernman kapab delivre e sov nou lekonomi dan sa sityasyon ki nou la, me se pou dan anmenn kestyon e ede ki Gouvernman i ava kapab fer li dan latransparans e dan prensip rann kont.

Lo sa size 13enm mwan Mr Speaker, bann endikater pa ti bon e mon ti konsernen ki sa pou enpakte lo nou popilasyon.

E sa osi ti enn bann rezon akoz mon ti anmenn sa *PNQ* semenn pase. Mon ti konnen e mon ti realize ki en sanzman pou pa donn 13enm mwan, pou bezwen osi vin avek en revizyon dan stati legal. Sa lamannman ki nou ti fer dan Lalwa Lanplwa pou bezwen ganny amande. Ouswa i bezwen annan en lamannman ki ava vin atraver bann mezir *COVID -19* ki pou fer ki Gouvernman pa pey 13enm mwan.

Me la mon ti ava kontan demann Vis-Prezidan avek Minis. Rezon mon ti oule ou vremen eksplor sa kestyon semenn pase se pou mon kapab anmenn en propozisyon.

Mon propozisyon i baze lo lefe ki nou annan bokou dimoun ki dan diferan *band* lo sa striktir saler. E sa ki mon ti pou propoze sete ki akoz dan sa konteks bann dimoun ki lo *lower band, band 1, e band 2* ki an tou i annan apepre 2987 zot, akoz sa bann nou pa ti ava kapab pey sa 13enm mwan?

Mr Speaker Prezidan in koz lo en *13th Month Salary Bill* ki pou ariv R560milyon. An 2016, nou *Bill* pou 13enm mwan saler ti R97milyon zis pou *public service*. Mon prezimen ki sa *Bill* in mont dan apepre 100 ekek milyon, akoz bann logmantasyon saler bann sanzman dan bann *Scheme of Service*.

Me dan 117milyon, dan sa 100 ekek milyon zis en serten poursantaz ki pou tonm dan sa bann *band* pli ba. Mon ti ava sizere e propoze ki Lasanble i siport en mezir kot bann ki dan bann *band* pli ba oubyen dan kous pli vilnerab lo kad saler, ler mon dir vilnerab mon pe dir bann dimoun ki pe travay, lo kad saler nou konnen ki nou annan *non-core* e bann dimoun ki dan *core*;- Vis-Prezidan i konn sa tre byen.

Nou kapab travay lo en mezir ki ava kout nou lo probableman pa plis ki R40milyon pou nou pey 13enm

mwan saler, pou sa bann kad endividi.

Mr Speaker rezon akoz mon pe dir sa, set akoz i annan dimoun ki pou ganny pli afekte avek en mezir pou pa pey 13enm mwan saler sa lannen ki lezot dimoun.

E lefe ki nou pe koz lo revwar *FA4GR*, mon pa ti ava kontan ki okenn Seselwa si nou kapab fer en keksoz pou ed li, ki trouv li dan en sityasyon pli difisil ki i kapab trouv li.

Mr Speaker sa *speech* devan Lasanble Nasyonal i premye *speech* ki Prezidan Ramkalawan in delivre. Mon'n vwar ki i pa fasil pou Prezidan sorti dan lapo *Leader* Lopozisyon e in fer serten komanter e mon apresye sa koman en politisyen nou pa kapab *fault* li pou sa.

Me letan fer politik in fini. Letan fer kanpany in fini. Nou annan en travay serye devan nou e mon ti ava propoze ki Lasanble Nasyonal dan le mezir ki nou *attend* en kestyon en Sesyon Kestyon avek Minis, nou fer li dan en fason ouver, dan en fason transparan, ki nou ava kapab ganny tou detay e ki nou ava kapab menm ede fer bann propozisyon avek Gouvernman, ki ava kapab ranforsi bann mezir pou ed nou

pei fer fas avek sa sityasyon ki i ladan. Mersi Mr Speaker.

(APPLAUSE)

MR SPEAKER

Mersi Onorab. Prezan mon pou envit Vis-Prezidan e Minis Finans pou fer en *statement* ki kapab pran serten leklersisman ki zot anvi anmennen lo diskour Prezidan. E i kapab enkli serten pwen e kestyon ki Onorab *Leader* Lopozisyon in leve. Mon a konmans avek Vis-Prezidan.

THE VICE-PRESIDENT MR AHMED AFIF

Bonzour Mr Speaker. Bonzour *Leader* Lopozisyon. Bonzour *Leader Government Business*, tou bann Manm Lasanble, tou pep Seselwa ki pe swiv Lasanble Nasyonal bomaten lo rezyon sosyal, partou kot zot ete bonzour zot tou.

Mr Speaker premyerman mon ti a kontan remersye Lasanble Nasyonal atraver ou, pour sa loportinite ki ou'n akord Prezidan Larepublik Prezidan Ramkalawan pour kapab adres pep Seselwa atraver Lasanble Nasyonal. E met devan zot sityasyon nou pei, gravite sityasyon kot i ete ozordi. E son lapel ki in fer avek pep Seselwa avek sekter prive

avek Gouvernman pou nou azir dan en fason ki vreman reflekte sa nivo serye ki sa sityasyon i ete ozordi.

E san repet sa ki Prezidan in dir ozordi, mon ti a kontan zis *remind* zot bann gran eleman ki pe fer nou dan sa kriz kot nou ete ozordi. E sa se ki enn nou sekter enportan ki tourizm, ki li ki anmenn laplipar deviz dan nou pei i ozordi lo son lipye. E vi ki deviz pa pe antre, me nou lobligasyon koman en Gouvernman i reste.

Savedir nou bezwen kontinyen pey pou bann etidyan ki aletranze, nou bezwen fer vin manze, *fuel*, nou bezwen pey nou det. Sa pa sanze sa bann, e alor ki fer ki mwens larzan pe antre an deviz me menm kantite pe sorti. Ki vedir ki nou pe manz dan nou rezerv Nasyonal e menm sekter prive i bezwen pe manz dan son rezerv deviz etranzer.

Lot kote ou pe vwar ki akoz sa sekter ki kle pa pe zer son bann loperasyon reveni ki Gouvernman i anmase avek zot e lezot sekter ki relye i tonbe konsiderableman. Me ankore enn fwa depans Gouvernman pa tonbe konsiderableman, parske li i bezwen kontinyen pey son saler, pey pou *goods and services*, pey en pep bann proze kapital.

Me an plis ki sa Gouvernman i trouv li e i normal dan sa lobligasyon, ki i bezwen kapab pey bokou bann kou saler dan sekter prive. Ki fer ki lo kote Gouvernman son reveni in tonbe e son depans i monte, li osi i bezwen rod tou mwayen pou kapab tenir son finans drwat.

Me ki byensir pe met presyon lo la kantite ki li i bezwen prete, parske i pa pe fer ase pour kapab pey pou sa demann ki annan.

Sa Gouvernman i krwar ki dan en letan parey, nou bezwen met laverite devan pep Seselwa. Nou bezwen fer zot apresye poudir nou pa kapab kontinyen parey nou ti abitye. Savedir sa lasal ki nou ti annan, kalite proze ki ou ti pou fer, saler ki nou ti a kontan peye.

Scheme ki nou ti a kontan fer, tou sa bann keksoz pou bezwen sanze pou reflekte la realite. E se pour sa rezon ki Gouvernman i santi li oblize pou li apros tou bann partener kle. E la mon pe koz sirtou bann partener enternasyonal tel ki Fon Monneter Enternasyonal, ki parey bokou pei i fer dan en letan difisil ou apros sa bann lorganizasyon pou kapab apiy ou pou ganny serten led.

E ki nou oule dir par sa? Nou, nou bezwen montre avek

lemonn poudir nou pe fer sa zefor, pou nou kapab balans nou Bidze otan ki nou kapab; ki tou dimoun pe fer en sakrifis ki neserer dan sa peryod.

E lo lot kote aköz ou kapab demontre sa avek en dimoun enparsyal tel ki Fon Monnetter Enternasyonal. Bann dimoun ki abitye pret ou larzan, ki'n deza pret ou larzan, oubyen bann pei ki ti a kontan fer en donasyon vizavi Sesel, zot a dir be nou osi nou pare aköz zot pe fer en sakrifis nou osi nou fer en zefor pou ed zot.

E se pour sa rezon ki prezidan Ramkalawan ti anonse ki in konmans en dyalog, ki pour vin dan en negosyasyon avek Fon Monnetter Enternasyonal pour nou kapab ansanm travay pou annan en program fiskal, e monnetter ki pou asire ki Sesel i reste dan en pozisyon stab e ki nou ganny sipor kominote enternasyonal.

An menm tan sa Gouvernman i kontan vwar ki depi ler Prezidan Ramkalawan in ganny elekte, e depi ler ki in form sa nouvo Gouvernman, nou'n tre ankouraze par sipor ki nou pe gannyen lo nivo enternasyonal. E sa sipor in vin parske zot in vwar pep Seselwa in koze, e ler nou'n get dan sa

Lasal i kler ki mannyer pep Seselwa in koze.

(APPLAUSE)

THE VICE-PRESIDENT MR AHMED AFIF

Me sa ki kler osi se ki lafason ki Gouvernman in komans son travay, in komans li dan en fason drwat, en fason non-partizan. Kot i pe tret tou Seselwa koman en zanfan Sesel. E sa model pou tret tou dimoun byen e pour respe drwa tou dimoun.

E *Leader* Lopozisyon in koz lo plizyer *Clause* dan Konstitisyon, *right to an Assembly, right to an opinion* eksetera. Nou respe sa, tousala nou respe. E se pour sa rezon ki sa stabilite in reste depi ler ki nou, nou'n antre. Prezidan Ramkalawan in vin dan son biro, e bann Minis in antre dan bann diferan Minister i pa'n annan okenn *redundancy*, i pa'n annan okenn 'ek nou, pa ek nou.'

Mon garanti zot sa napa. E se sa fason ki nou pe atir lemond, pou regard nou e vwar poudir nou pou vin en model pou kapab annan stabilite politik ki li i pou anmenn devlopman ekonomik.

E swivan sa Prezidan in anons par egzanp don. E don

se i vin akoz i annan sipor ki pe vin anver Gouvernman, parske zot kontan vwar sa progres ki pe arive. E mon kontan ki La Digue in benefisyè avèk enn sa don e pep Baie Lazare in osi e i pou benefisyè a travèr en don.

Mr Speaker Prezidan Ramkalawan in krwar dan latransparans. Prezidan Ramkalawan i krwar e sa Gouvernman i krwar nou, nou bezwen respe tou reg e regilasyon, kot i konsèrn konnen eki ki ou pe dil avèk.

E si i annan investisè oubyen en dimoun ki'n fer en donasyon i anvi reste anonim, nou, nou bezwen respe sa. Me sa ki enportan se ki nou, nou konnen e ki nou pe dil avèk.

E mon garanti ou Onorab tou dimoun ki nou, nou pe dil avèk se bann dimoun onnet, bann dimoun ki nou konn son *KYC, Know Your Client* e bann dimoun tre, tre responsab onnet e ki annan kont ki zer biznes. E bann dimoun ki byen konn par lemonn entènasyon.

Alor mon oule asir ou ki tou sa ki nou dil avèk i bann dimoun ki *genuine*, bann dimoun ki annan lentèr Sesel akèr. Alor mon mesaj i tre senp pou pep Seselwa, si ou ki dan lakour, parey mon ou en sitwayen, annou realize poudir

sityasyon i grav. Lavi ki nou ti viv zis lan pase i pa pou kapab parey sa lannen, ziska ler keksoz i amelyore e nou pou bezwen priyoritiz tou sa ki nou depanse.

Si ou ki dan biznes ou osi ou bezwen realize poudir dan biznes pou annan serten lobligasyon. Wi lanvironnman in sanze ozordi Dolar i pli ser, kou looperasyon i monte, e natirelman pou ou fer 2 bout zwenn, ou bezwen kapab ou pti pou monte.

Me selman an menm tan ou koman en biznes ou bezwen mazin poudir ou form parti en kominote. E annou mazin sa kominote ler nou fer nou pri, ler nou fer nou annan nou fason fer dan biznes ki nou gard antet poudir nou form parti en kominote. E pour Gouvernman byensir e ki nou ki dan Gouvernman ozordi, nou, nou pe fer sir ki nou pe met Lepep Seselwa ek son byennet devan e par lao tou keksoz.

I pa pou toultan fasil pou Gouvernman fer en keksoz parey. Parske ozordi non selman i bezwen soutènr son travayer, me i annan travayer dan sekter prive ki bezwen fer fas avèk e pey zot saler.

Onorab *Leader* Lopoziyon in koz lo serten propoziyon ki i ti pe mazin

pour 13enm mwan. Personnelman mon krwar i pou anmenn plis konfizyon pou komans annan diferan plas ki pou annan en 13enm mwan, parske pa bliye poudir si ou pou fer sa pou travayer Gouvernman.

E ozordi ou pe pran lobligasyon sekter prive, eski ou pou al gete dan sekter prive lekel ki dan ki *band*. E ou pou al donn zot osi, be konbyen i pou ariv ou?

Tousala se bann kestyon ki Gouvernman in balanse tou sa bann keksoz, e plis ki R500milyon pou en 13enm mwan dan en moman kot ou napa reveni, i en desizyon ki mon krwar iresponsab e Gouvernman i vin drwat e dir keksoz parey i ete. Alors sa desizyon i ganny mentenir, e byensir sa i pou bezwen vin atraver en amannman dan Lalwa ki pour bezwen pase. E nou ava fer le neserer pou met sa devan Lasanble Nasyonal.

Mr Speaker mon, avek ou permisyon mon ti a kontan demande ki nou fer li zis en *Statement* lo mon kote. Minis Finans i dir ek mwan poudir sa ki i pou dir pou vremen reflekte sa ki mon'n dir la, alor avek ou permisyon si nou kapab fer sa en *Statement*. E i a donn plis letan pou bann Manm osi

kapab demann kestyon e nou, nou ava kapab reponn pou byensir satisfere sa ki zot pe demande. Mersi bokou Mr Speaker.

MR SPEAKER

Mersi Vis-Prezidan. Wi mon krwar ou sizesyon i fer bokou sans. E nou a komans avek kestyon. E lo lalis premye mon annan Onorab Gervais Henrie. Ok, tenir en pti moman anler e mon a pran lalis, e apre mon a kapab prosed avek en kestyon.

Tre byen mon krwar mon annan tou lo lalis. E sa i preski tou dimoun dan lasal. Alor e sa ki mon pou fer mon pou balans en pe kestyon enn kote isi, e enn kote laba, akoz i enposib pour mwan konnen dan ki lord zot in lev lanmen. Mon'n pran tou ansanm. Premyerman mon a pas laparol avek Onorab Arissol pou en klarifikasyon, wi.

HON SANDY ARISSOL

Mr Speaker bonzour. Bonzour VP Minis tou Manm Onorab e tou dimoun a lekout. Mon ti anvi zis avan lev mon lanmen pou kestyon demann en klarifikasyon Mr Speaker.

Kekfwa pou bann Manm osi. Eski kestyon ki nou pe demande ozordi la bomaten i relye senpleman zis avek *Statement* ki Minis Finans in

fer, oubyen nou kapab demann en pe klarifikasyon lo *Statement* ki Prezidan ti fer yer? Pou *VP* avek son Minis profite reponn letan zot la. Mon ti a kontan ganny sa klarifikasyon silvouple.

MR SPEAKER

Wi, ozordi sa ki nou pe fer i en ekstansyon sa diskour Prezidan ki in donnen yer. So size ki mon ekspekte nou trete i bann size ki'n sorti dan son diskour. E mon ekspekte ki Vis-Prezidan e Minis Hassan i ava adrese sa bann size, *ok?* Tre byen mon a konmans avek Onorab Gervais Henrie. Wi, Onorab eski ou annan en pwen? Wi.

HON WAVEN WILLIAM

En *point of order* Mr Speaker. Premyerman bonzour. Bonzour Vis-Prezidan avek Minis e tou dimoun i a lekout.

Mr Speaker Sir, par lefe ki sa diskour ki Prezidan in fer in tous bann diferan sekter, e mwan mon ti a kontan ganny en gidans avek ou, par lefe ki in tous bann diferan sekter e lafason ki kestyon pou ganny demande, konbyen *round* kestyon i pou annan?

Akoz i posibil ki lo diferan sekter plizyer Manm pou anvi koze, so mon pe vwar li en pti pe vag, si ou pa donn nou

gidans lo la. Eski, konbyen *round* kestyon nou pou annan, akoz i annan diferan sekter e sirman i pou annan bann *supplementary*, so Mr Speaker si ou ti kapab gid nou lo la. Mersi.

MR SPEAKER

Mon a sey eklersi ki mannyer mon lentansyon pou prosede. Mon pou komans avek en kestyon e baze lo size ki leve mon pou pran kestyon avek bann dimoun ki'n deza lev lanmen, si zot annan kestyon lo menm size.

So nou a pran sa akoz mon lentansyon se fer sir ki tou dimoun, tou Manm i annan en posibilite pou zot poz kestyon ki zot oule ganny klarifye.

Alor nou pou sey gard en lord lo size ki nou trete, me sa i pa pour toultan posibil. Mon war sa klerman mannyer nou avanse, nou a regarde ki mannyer nou bezwen aziste. Mersi. Si nou kapab komanse prezan. Onorab Henrie.

HON GERVAIS HENRIE

Mersi Mr Speaker. Bonzour tou dimoun. E zisteman mon kestyon i ava lo tenm prozeksyon depans avek reveni, pour ki popilasyon ankor enn fwa i sezi lir zans sityasyon ki nou ladan e anpese ki i annan

bann demann popilis parey *Leader* Lopoziyon in fer bomaten.

Premye kestyon i se ki, eski nou kapab ganny dizon en kontrandi pandan sa dernyen 3mwan, konbyen reveni ki'n antre dan kof Gouvernman par mwan? E son depans par mwan pour ki nou apresye lir zans sa sityasyon ki nou ladan?

E dan menm laliny mon ti ava apresye, si Minis Finans i eksplik nou, ki par egzans sa R10.5bilyon ki sa lamannman dan *Appropriation Bill* ti aprouve an Mars 2020, eski i la li? Eski in ganny mete dan kof Labank Santral, pour ki alor nou krwar poudir i *ok* pou nou kontinyen depans parey Gouvernman ti ava anvi?

Eksplik nou bann dimoun ki mannyer sa Bidze i ganny fer, pour ki alor nou sezi e apresye irzans sa sityasyon ki nou ladan, e anpese ki bann demann popilis i vin devan nou. Mersi Mr Speaker.

MR SPEAKER

Mersi. Minis Finans, kestyon i adrese pou ou.

MINISTER NAADIR HASSAN

Bonzour Mr Speaker. Bonzour bann Manm Onorab e bonzour tou dimoun ki a lekout. Ou premye kestyon Onorab, mon

pe esper lenformasyon avek *PS* mon a donn ou en pti kou. Me lo ou dezyenm kestyon *regarding the Bidze of R10.5bilyon.*

Annefe ler Gouvernman i annan li sa ki apel en *Consolidated Account* kot tou larzan Gouvernman i antre, e bann depans ki ganny *allocated* avek tou bann Minister, bann lazans. E ki nou'n war se ki nou ti vin, Gouvernman oparavan ti vin devan Lasanble avek en sonm adisyonnal 1.2bilyon *ok*, ler ti annan *COVID*.

Me ler mwan mon'n vin dan Lofis i se ki sa Bidze ki'n ganny aproprye pou 2020, i pa pou ase pou soutenir bann depans ki'n ganny fer. E bann depans ki nou bezwen fer ziska lafen lannen 2020.

Annefe Minister Finans pe travay lo en *supplementary* ki apepre R1.4bilyon adisyonnal. E mazorite sa larzan se pour soutenir bann *Scheme* ki'n ganny met an plas *FA4JR*, bann pou *HFC* ti annan 25poursan. E sa i pou bezwen sa larzan adisyonnal e i osi annan bann lezot det ki bezwen ganny kouver.

E sa osi i anmenn mwan a en lot pwen ki sanmenm sa i enportan ki ler nou get Bidze 2021, nou bezwen get li dan en fason ki nou akt responsab e

nou anmenn en Bidze ki pei i kapab *afford*. E sanmenm sa ki i annan bann desizyon ase difisil ki nou bezwen pran, me selman nou bezwen pran sa bann desizyon.

E si ou get bann endikater kot ou *budget deficit* pou 2020 i sipoze ariv 23poursan. Sa i vremen alarman akoz i osi *mean* ki ou det, koz ler ou annan en *deficit* ou bezwen al *borrow* pou finans sa *deficit*. E nou det pou desann pou deza sot 100poursan.

So sanmenm sa ki enportan ki dan an lanvironnman kot nou reveni pa pe monte. Me nou depans i ase o, ou pa kapab afekte reveni me ou kapab kontrol depans. E la i kot nou bezwen fer sa zefor pou redwir depans Gouvernman.

Lo ou premye kestyon lo kantite larzan ki'n antre dan kont Gouvernman *from* Zilyet pou Septanm Gouvernman in kolekte 1.4bilyon an *tax* e 224milyon dan *non-taxes*.

E total reveni ki'n ganny kolekte *as at* Septanm i 5.1,3bilyon. E nou *deficit as at* Septanm ti *minus* 11.1poursan. Mersi.

MR SPEAKER

Mersi Minis Finans. Eski i annan lo sa kote okenn kestyon

ki spesifikman lo sa size? Onorab Gill.

HON CHURCHILL GILL

Mersi Mr Speaker. Bonzour tou dimoun prezan. Mon kestyon se nou annan en larepons ki Minis Finans in donnen. Alors eski bann dimoun ki ti deza annan laplikasyon pou *FA4JR* ki pa ankor ganny peye, eski zot pou ganny peye?

Eski bann peyman pou sa bann dimoun i pour ganny *backdate* pou bann mwan ki zot pa ti ankor ganny peye? Kan ki ou Minister i ekspekte finaliz sa bann peyman pour tou sa bann dimoun ki pe espere? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Lenformasyon ki mon annan se ki pou *FA4JR* napa en sistenm *backdate*.

So ler laplikasyon i vini, peyman, sa laplikasyon i ganny *process* e peyman i ganny fer. E pou annan en *backdate* dan zis en sityasyon, e sa kot i annan bann *appeal* ki ganny fer. E ler i annan *appeal* e si sa *appeal* i *successful*, then la ou sel sityasyon kot ou pou kapab annan en *backdate*. Be selman

dan prosedir normal lenformasyon mon annan se napa en sistenm *backdate*. Mersi.

MR SPEAKER

Mersi. Bann Manm ki'n lev kestyon la, mon bezwen zis fer zot realize poudir ler mon'n fer en *round* la prosen, mon pou bezwen donn lezot Manm posibilite demann kestyon. So i pa pour kapab retourn lo zot deswit. Onorab Gill oule swiv?

HON CHURCHILL GILL

In reponn zis lo *backdate*, be selman mon kestyon ti i annan bann dimoun ki annan zot laplikasyon ki zot pa ankor ganny peye. E prezan mon kestyon se eski, vi ki Prezidan Larepiblik in anonse ki *FA4JR* pe al ganny revize lannen prosenn. Pou sa bann laplikasyon ki deza kot sa bann Minister si sa bann dimoun zot pou ganny peye avan sa revizyon i fer?

Aprè mon dezyenm kestyon se si, ou anvizaze fer sa avan ki sa revizyon i ganny fer? Pou en mannyer sa bann dimoun ki pe esper, e i a ganny en nide ki pou arive ek zot laplikasyon. Mersi.

MR SPEAKER

Mersi Onorab Gill. Minis.

MINISTER NAADIR HASSAN

Mersi Mr Speaker. Onorab lenformasyon ankor ki mon annan se ki mannyer *FA4JR* pe marse. Se ki tou le mwan i annan bann laplikasyon ki kapab vini e sa bann laplikasyon i ganny *process*. E tou laplikasyon ki'n ganny *receive* in ganny *process*. E si i repons i pozitiv zot pour ganny peye, wi.

Sa revè ki nou'n koz lo la lo *FA4JR* a i aplikab pour 2021. So pour 2020 laplikasyon ki ganny fer si i *successful* i pour ganny peye. E i pour ganny peye sa lannen. Mersi.

MR SPEAKER

Mersi Minis. Onorab Andre.

HON CLIFFORD ANDRE

Mersi Mr Speaker. Bonzour *VP* avek ou delegasyon. Bonzour tou dimoun a lekout. Minis mon ti a kontan ki nou eksplik pep Seselwa, ou'n dir ki i annan en *deficit* 23poursan. Kwa ki'n koz sa *deficit*? Eski i senpleman sityasyon *COVID*?

Oubyen akòz parey ou'n dir ki Bidze pou pran konsiderasyon gaspiyaz ki ti pe ganny fer. Eski dan sa pti git letan 24 zour. E i annan ki dan 2 semenn zot in dan lofis. Zot in vwar ki ladministrasyon avan ti

pe fer bokou gaspiyaz, e se sa ki'n met nou, in kontribye setadir pa met nou ladan. Me kontribye pou nou annan sa *deficit* ki ozordi, nou pe bezwen demann pep Seselwa pou donn nou en koudmen pou remet nou dan en bon direksyon?

Apré mon dezyenm kestyon Minis se, eski i posib pou eksplike, oubyen parey nou tou nou konnen, bann dimoun ki ganny mwens dan sosyete, i pou toultan annan, menm avek sa restriktirasyon ki pe ganny fer i pou toultan annan sa posibilite pou zot al kot *Welfare*, e pou zot met zot *case* devan kot lasistans i pou toultan *available* pou zot ganny asiste? Mersi.

MINISTER NAADIR HASSAN

Mersi Mr Speaker. Mersi Onorab pour ou kestyon. Lo kwa ki *cause* sa *budget deficit* se 2 rezon, ou annan lo en kote ou reveni ki'n redwir sibstansyelman, e lot kote ou annan ou depans ki'n monte ok.

So lo ou dezyenm kestyon akoz ki nou annan en *déficit*. I en size ase kompleks, me mon a adres li dan en fason zeneral. Enn se ou annan tou sa bann *Scheme* ki'n ganny met an plas. Ki parey mon'n mansyonnen on kou i vreman o. *FA4JR* lo li menm i 1.4, R1.5bilyon.

So mon lopinyon se ki okenn lasistans ti devret *targeted assistance*. E sa ti pou en mezir ki ti pou pli responsab e osi pa ti pour met sa *additional burden* fiskal ki ou Gouvernman in war li bezwen fer.

Lo kote *government wastage*, i apepre 2 semenn mon'n dan Lofis e bann konversasyon ki mon'n fer ek bann lezot Minis, wi i annan plizyer siny ki poudir nou ti kapab kontrol nou depans dan en fason pli byen. E sa i *across* diferan Minister e lazans.

Annefe i annan en legzersis ki *PS* pe fer, pou regarde ki bann mezir ki kapab ganny pran pou ranforsi sak eleman poudir nou bezwen depans larzan dan en fason pli responsab. E osi sa mesaz i kler osi ek tou bann Minis. E konversasyon ki mon'n gannyen ek zot se ki zot war en kantite landrwa kot *wastage* i kapab ganny redwir. E sa i pou en *focus* vreman for dan preparasyon Bidze 2021.

Me osi pa zis preparasyon Bidze, i ki mannyer ou enplimante. E la kot mon krwar Vis-Prezidan in mansyonnen avan, se ki tou travayer osi i bezwen fer li son responsabilite pou dir ki tou aktivite, tou

depans ki nou pe fer i dan en fason responsab. Mersi.

MR SPEAKER

Mersi Minis. Mon a pran ankor en kestyon lo sa size, lo sak kote. Apre nou a bezwen *move on*. E si zot kestyon i retourn lo Minis Finans zot a touzour kapab re demande. Onorab Cosgrow.

HON WALLACE COSGROW

Bonzour Mr Speaker. Bonzour VP, Minis, PS, bonzour tou Manm Onorab bonzour tou dimoun ki pe ekoute. Mr Speaker mon kestyon i baze en pti pe lo sa zafer *FA4JR* e en pti pe lo sa ki *Leader* Lopozisyon ti koz lo la bomaten. E mon ti a kontan demann Minis, vi ki Prezidan in koz lo *FA4JR* spesifikman yer, ki mannyer zot anvizaze restriktir *FA4JR*?

Mon krwar bann biznes deor ti a kontan konnen aköz zot dan lensertitid la en? En lanons in ganny fer konmkwa pou ganny revwar, biznes i dan lensertitid. E nou konnen ki mannyer ler biznes i ganny soutenir ki *ripple effect* i annan lo travayer, lo peyman *tax*, lo isi lo laba e mon pa bezwen eksplik pou sa Minis. Ki mannyer zot anvizaze restriktir *FA4JR* e eski zot pe tret *FA4JR* separeman

avek bann lezot lasistans ki ti deza ganny met an plas?

La mon pe fer referans par egzanp, pour program *SETS* kot bann dimoun ti ganny refer avek *SETS*. Par egzanp letan zot ti pe ganny fer *redundant*; program *URS* kot bann dimoun ti war zot tanporeman an deor en louvraz aköz sityasyon ekonomik. So eski zot pe tret sa ansanm? Eski zot pe revwar tou sa bann program?

E adisyonnelman pou *stretch* en pti pe lo kestyon ki'n ganny demande avan, *social safety net* dan sa letan, eski nou pe met lanfaz lo la? Ouswa sa osi pe ganny revwar? Mersi bokou Mr Speaker.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Lo kestyon *FA4JR* pou le moman i pa ankor finalize son *final product* ki mannyer i ete, me selman mon kapab donn ou bann gran liny ki nou pe fer.

Annefe i annan en, parey i ti anonse yer en *High Level Crisis* ki'n ganny formen ki mon'n *share*. Ladan i annan en *sub component of the team* ki pe headed by SS Payet ki pe regard *FA4JR*. E sa pou ganny finalize

by semenn prosen. Kot prezan diskisyon avek sekter prive pou komanse, *ok*.

So ki nou pe gete *FA4JR*. *FA4JR* pa kapab ganny regarde dan izolasyon *ok*? *FA4JR* ou bezwen get li *in terms of* sa program *SETS*. Ou bezwen get li lo *social safety net* ou bezwen get tou sa keksoz ansanm.

So ki sityasyon nou annan la, nou annan en sistenm *FA4JR* ki pe pey saler bann travayer, me i pe pey saler travayer *whether* ou dan en sekter ki prodiktiv ouswa ki pa prodiktiv. Me lo lot kote ou annan plis ki 15mil travayer etranze Sesel.

So kekyon ki vini se ki, eski ou kapab kontinyen pey saler dan en sekter ki pa prodiktiv? Me selman ou annan en sekter ki li i ankor prodiktiv me i pe pey en etranze?

So ki ou bezwen fer se ki *through SETS C*, *through* Minister Lanplwa e osi avek lasistans sosyal, kot travayer ki dan bann sekter ki akoz problem ekonomik ki'n arive, ou bezwen sey bouz zot, *reskill* zot pou zot kapab pran bann louvraz kot i *still* annan lanplwa ladan.

So nou pe get li dan sa laliny kot *as* lasistans *FA4JR* i redwir, *then* bann travayer i *still* annan en lanplwa dan bann

sekter ki ankor prodiktiv. E ladan dan milye nou bezwen annan bann *social safety net*, ki *capture* bann dimoun vilnerab ki zot kapab ganny sa lasistans ziska zot kapab al dan en lanplwa en pe stab.

So sa i bann gran laliny, me son egzakt detay, sa *once* ki i finalize sa diskisyon konsiltasyon avek sekter prive. E osi bann reprezantasyon bann travayer i ava'n ganny diskite. Mersi.

MR SPEAKER

Mersi Minis. Lo sa kote, eski i annan lot kekyon spesifik lo azisteman ekonomik *FA4JR*? Mon a pran sa 2, Onorab William premye apre Onorab Hoareau. Onorab William wi.

HON WAVEN WILLIAM

Mersi Mr Speaker. Mr Speaker mon ti a kontan ki Minis i eksplik sa Lasanble, e osi sa pep deor la pour ki zot a kapab byen konpran. Pour ki letan nou pou fini sa lannen si mon'n ekout Minis byen baze lo bann sif ki'n donner, nou pou pe al depans plis ki R12bilyon apepre.

E mon anvi ki Minis i fer konpran e dir avek sa Lasanble, avek pep ki pe ekoute, ki in annan en serten degre irresponsabilite dan lafason ki

bann mezir fiskal e monneter in ganny fer, sirtou par lefe ki ti pou annan eleksyon sa lannen.

E sa pou retir en pti pe sa bann kalite politik, kot serten politisyen *US* pe fer konpran poudir ek dimoun, poudir baze lo bann nouvo mezir ki bezwen ganny pran, pou koriz sa sityasyon ekonomik. Pou zot pa dir ek dimoun poudir be vwala zot ti le sanzman, vwala sanzman ki pe amenn zot. Mersi.

MR SPEAKER

Mersi Onorab. Minis oubyen VP. Minis ou a...

MINISTER NAADIR HASSAN

Mersi Mr Speaker. Mersi Onorab pou ou kestyon. Wi parey mon mansyonnen. Mou lopinyon lo bann mezir ki'n ganny pran, wi Gouvernman ti'n devret pli responsab dan depans ki ganny fer, bann mezir. E ankor mon le met lanfaz pou dir ki bann mezir ti devret pli *targeted*. Akoz dan ou dimoun ki ti bezwen lasistans, *whether* ou ti bezwen ouswa ou pa ti napa, ou gannyen lasistans.

E sa i apel ou pe pran bann *blanket measures*, bann *broad measures*, ki i pa vreman efektif *from en cost element*. So

sanmenm sa ki enportan ki mezir ki ti devret ganny pran, mezir ki ti pou responsab, se pran bann mezir ki *targeted*. Poudir sa bann dimoun ki vilnerab. E sa bann dimoun ki mon pe target pou ed zot. Si sa ti ganny fer, *then* kou lo Gouvernman ti pou mwens.

So pou reponn ou kestyon Onorab, wi, mon krwar poudir nou ti kapab pli responsab dan bann mezir ki ti'n ganny pran, ki a lafen defen sa pa ti a vin en *burden additional* lo finans Gouvernman. Mersi.

MR SPEAKER

Mersi. Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour Minis, e tou dimoun a lekout. Minis, Prezidan in koz lo devalyasyon Roupri kont Dolar, e in koz osi lo nou lekonomi ki dan mal. E an vi ki i annan bokou *Scheme* ki'n ganny kree zis avan eleksyon pou ofer kredi. E sa pa ede ditou pou stabiliz to lesanz. Ki sa nouvo Gouvernman pou fer pou, ki i anvizaze fer zisteman avek tou sa bann nouvo *Scheme* ki'n ganny entrodwir, pou fer sir ki to lesanz i ganny stabilize? Mersi.

MR SPEAKER

Mersi Onorab Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Lo konsernan to lesanz, i annan 2 faktor ki normalman kapab afekte ou to lesanz. Enn se wi si i annan bann, ou nivo kredi dan lekonomi pe *increase*. I met en presyon lo *foreign exchange*. Me osi depans Gouvernman. Pli Gouvernman i depanse, sa i met plis likidite dan sistenm, i met plis presyon lo *foreign exchange*.

So normalman pou stabiliz ou *exchange rate*, ou bezwen annan *alignment between* ou Polisi fiskal e ou Polisi monneter. E sa i enpakte lo kantite likidite i annan dan sistenm. E la i annan en travay ase konzwen ki pe ganny fer avek Labank Santral. Ki lo en kote la ki ou pou war se ki Gouvernman pe kontrol lo kote fiskal depans. Savedir redwir likidite ki i pe met dan sistenm.

Me osi Labank Santral son kote i pe fer zefor pou retir likidite dan sistenm. E sa a *medium term to long term*, i sipoze anmenn ase stabilizasyon dan ou *exchange rate*.

Me lo kote kredi parey mon'n mansyonnen. Wi, kredi i kapab anmenn presyon lo ou

exchange rate. Me selman i enportan osi ki sa kredi ki ganny mete, *again i targeted*. Akoz la ou pe *focus lo* biznes. E biznes i annan serten kou ki zot pa pe kapab zwenn pou lemoman. Akoz *obviously* biznes in tonbe, e sa bann kredi i *facilitate* zot.

Me *again* ou pa kapab fer li *broad*, be ou fer li targete, bann biznes ki bezwen. E sa mon krwar i annan en louvraz ki Labank Santral ansanm ek bann labank pe fer lo la. Mersi.

MR SPEAKER

Mersi. Prezan nou a pas lo en lot dimoun. E si zot annan lezot kestyon lo zafer azisteman ekonomik, zot a kapab retourn lo la pli tar. Mon a pas laparol Onorab Conrad Gabriel.

HON CONRAD GABRIEL

Mersi Mr Speaker. Bonzour tou dimoun a lekout. Bonzour tou Manm Onorab. Bonzour spesyal dimoun Pointe Larue. *Welcome* Minis ek ou delegasyon. *VP* osi. Dabor i annan bokou size ki'n ganny aborde premyerman par diskour Mr Prezidan Ramkalawan yer. I en bon pe size. I difisil pou nou tous tou sa keksoz an menm tan. Selman ...

MR SPEAKER

Onorab Gabriel prosed lo ou kestyon.

HON CONRAD GABRIEL

Yes, i pe vini Mr Speaker. *Therefore*, mon pou tous preziman lo sa 13enm mwan saler. Nou'n aprann ki pa pe ganny ditou. E zis yer Lasanble in fini, kantite *text, call* ki nou'n gannyen avek nou zabitan, i enorm.

Petet ti a bon fer tou dimoun konnen poudir. Tou dimoun ki'n pas dan sa sizyenm Lasanble in fini tous zot gratwite *or whatever you want to call it*. Zot in fini ganny zot larzan, e nou, nou pe ganny dir bann pti Seselwa ordiner, pran pasyans. Sa pa pou en Nwel parey labitid, isi laba. So, mon propozisyon petet pou Minis,

Eski dan zot *High Level Crisis Team Committee*, zot in dabor pas lo bann keksoz ki zot kapab *streamline*? Par egzanp i annan bann *Board allowance* ki bann dimoun pe gannyen.

Petet pa donn tou *thirteenth month*, be solman pou Seselwa tann en keksoz la Novanm. Kot in donn tou depi Zanvy ziske la, pou li ganny dir i pa pe ganny son *13th month*. I en pti pe malere. Nou sizere get sa bann *Board allowance*.

At least, lanmwatye *thirteenth month* donn bann dimoun *out there*. Akoz i pou *unfair Minister*. Vreman *unfair*. I ti en Lalwa, so nou pa konnen ki mannyer nou pou elabor sa size. Be solman ti a bon.

MR SPEAKER

Be poz en kestyon Onorab Gabriel.

HON CONRAD GABRIEL

Kestyon, eski *Board allowance* pa ti a kapab soulaz en pe, petet ou pa donn *thirteenth month*, donn sa *at least* en bout? Akoz Seselwa *out there* in travay *Minister*. Mersi.

(Interruption)

MR SPEAKER

Order silvouple.

HON CONRAD GABRIEL

Mersi bokou.

MR SPEAKER

Ou konnen mon ti akord *Leader* Lopozisyon loportinite pou fer en efektivman pou li prezant en kantite sa bann pwen ki i le fer koman *statement*. Prezan nou pe pas lo kestyon ki neser pou klarifikasyon. Mersi Onorab Gabriel. Mon a pas laparol Minis.

MINISTER NAADIR HASSAN

Mersi Mr Speaker. Mersi Onorab pou kestyon. Annefe i annan en legzersis ki'n fini ganny fer ki bann *Board fees* in ganny redwir. *Ok?* E depi Avril. E i osi annan en legzersis *as part of* preparasyon Bidze 2021, ki pe regard tou bann *issues* kot nou kapab fer rediksyon.

Me selman mon krwar i enportan ki nou tou nou pran responsabilite, pou nou eksplik Lepep Seselwa akoz nou pa kapab pey en 13enm mwan saler. I *obvious* personn pa kontan ler i pa pe ganny en trwazyenm mwan saler. Sa i normal. Bann Minis, Prezidan. Tousala zot *end of year benefits* i pe ganny retire. Be selman mon krwar i responsabilite nou tou pou nou endik pep akoz nou pa kapab peye.

E zot pou konpran. Akoz mwan i annan plizyer dimoun ki mwan mon'n koz avek ki *obviously* zot pa kontan. Be selman ler mon eksplik zot *the bigger picture*, ki zot konpran. So, mon krwar nou tou nou bezwen pran nou responsabilite e edik pep sa moman difisil ki nou pe pas ladan. E ki bann sakrifis ki zot bezwen fer.

E parey Prezidan in mansyonnen yer, ki dan 1an, 2an, nou dan en pozisyon pli

fasil pou nou *recover from* sa kriz ki nou ladan. Mersi.

MR SPEAKER

Mersi Minis. Eski i annan kestyon lo sa kote lo 13enm mwan saler? Mon a bezwen met ou non lo lot lalis. *Sorry*.

Ok nou a pas lo en lot size alor. E lo 13enm mwan saler? Wi, *ok*. Onorab Uranie.

HON ROCKY URANIE

Bonzour Mr Speaker. Bonzour Vis-Prezidan. Bonzour *Minister*. Bonzour *PS*. Bonzour tou Manm Onorab. Bonzour tou Digwa, e zabitan Zil Pros a lekout.

Mon kestyon i, Mr Afif. An relasyon ki *Leader* Lopoziyon in dir pou donn 13enm mwan saler *at least* bann ki pli vilnerab, ou, ou'n dir ki petet sa i pou konfiz dimoun. Me selman parey nou dir 'byen koze i fer byen konpran'. E si zot eksplike akoz mon krwar dimoun i a ganny en konpran.

E parey Onorab Gabriel in dir la, petet kantmenm pa donn tou, me *at least* donn lanmwatye. Sirtou Digwa ki nou santi nou sa distans kot nou ete, nou kou pou Digwa i vreman o. E Digwa pou soufer plis avek sa mankman pa ganny sa 13enm mwan saler.

Me en Polisi parey *Leader* Lopoziyon in dir, ti ganny fer. En Polisi ti ganny fer pou tou Seselwa. In met an plas pou tou Seselwa. E ler nou tann ou dir poudir pou annan konfizyon pou 13enm mwan saler. Me selman ler pou donn deviz pou fer vini transpor, nou war ki pou napa konfizyon ki ler zis en pe ki pou gannyen konmsi.

So ...

(Interruption)

MR SPEAKER

Ale. Silvouple annou evite enteronpe. Be selman Onorab Uranie poz ou kestyon silvouple.

HON ROCKY URANIE

Wi. So Mr Speaker, solman mon kestyon i, ou pa krwar poudir ni menm bann dimoun ki pa devret ganny sa deviz pou al rod, pou al aste transpor dan sityasyon ki la nou dan en kriz ekonomik?

MR SPEAKER

Ok. Ale ou kestyon prezan i lo deviz. Mon a permet Vis-Prezidan reponn. Wi.

THE VICE-PRESIDENT MR AHMED AFIF

Mersi Mr Speaker. Onorab i annan 2 parti, 2 kestyon ki ou'n

demande. E mon a komans sa enn premye lo 13enm mwan. Sa ki mon ti dir dan mon deklarasyon la bomaten, pou donn plis detay lo sa ki Prezidan li menm ti dir yer.

Lo 13enm mwan se en desizyon ki kouvert tou dimoun. sektor piblik ek sektor prive. En desizyon ki pou sov omwen R540 milyon koman depans en larzan ki napa dan Bidze ozordi. Se sa lo 13enm mwan. Ti annan en propozisyon ki petet sa ti devret aplik, 13enm mwan ti devret aplik pou serten dimoun. Be parey ou konnen Lalwa *Employment Act*, i pa koz lo si ou dan Gouvernman ou dan prive. Lalwa ti enpoz sa depi tou lede.

E ler Gouvernman in fer en desizyon ki depi sektor piblik, depi sektor prive, tou lede pe ganny afekte ozordi, zot napa sa reveni. E annefe Gouvernman ki pe sibvansyon sektor prive ozordi. Dan en moman kot li menm i napa larzan, Gouvernman olye fer keksoz ki pa kler, ki fasil ganny kritike.

Mon a donn ou en legzanp, si demen serten travayer dan serten *band*, li i pou ganny en 13enm mwan. Sa enn ki zis akote li dan sa *band* pou demande akoz li i pa'n gannyen.

Sa enn ki dan sekter prive, i pa dan en *band*. Li i ti dan en lankadremman dan sekter prive. Pou dir be mon ti abitye ganny dan *FA4JR* mwan, be la mon pa pou gannyen mon saler mwan osi mwan? Konmsi mwan mon pa enportan mwan? Sa bann kestyon pou monte sa. Ou pou kree konfizyon parmi pep Seselwa. Zot pou komans demann plis kestyon, dan en lepok kot nou koman en Gouvernman nou'n eksplik kler kantite larzan ki i annan.

Nou'n dir klerman en sakrifis i bezwen. Alors si nou fer en sakrifis, annou demann popilasyon an antye pou fer en sakrifis. Me ler nou fer en sakrifis i pa vedir nou abandonn nou popilasyon. I toultan annan en sistenm rekour *welfare* ki pou pran ka avek bann ki vreman vilnerab.

Me annou fer keksoz ki senp, ki kler, ki annan bann lobzektif direk. E kot Minister Finans li, i konn egzaktman kot i debout lo pwennvi fiskal. E o firamezir ki sityasyon i amelyore, sa sityasyon a ganny revwar. Petet, e pa bliye, pa anpese ki dan Gouvernman, dan sekter prive, dan bann lantrepriz, kot zot santi zot anvi donn en *bonus*. E zot kapab fer akoz zot sityasyon finansyel i

permete. Personn pa anpes sa arive.

Si i annan lantrepriz ki dan diferan zil. Dizon La Digue, ki krwar ki zot kapab fer sa arive. Pa anpese ki sa i arive. Zis ki nou pe dir, dan Lalwa, lobligasyon i pa pou la otomatikman. E Gouvernman li i napa sa finansman ozordi pou fer sa.

Lo sa dezyenm kestyon konsernan deviz. Napa personn ki pe al ganny deviz dan en sistenm par la. Se pa sa, sa mezir. Mezir i tre senp. Sa ki annan deviz etranzer ozordi, i annan mwayen ki pa pou vin en pwa lo rezerv Labank Komersyal, oubyen rezerv Labank Santral. E ki kapab fer sa depans pou fer vini en transpor. En mezir tanporer i ganny mete, ki permet zot kapab fer vin en transpor.

Sa mon krwar i en keksoz ki pou annan benefis direk. Parske lo en kote ou pe ed en sekter ki annan deviz pou li itiliz sa deviz. Ou pe ed sa sekter li menm ki dan sa lendistri, pou kapab annan en pe biznes. E alors reste debout. E pa bliye zot annan travayer. I pa aplik zis pou en dimoun sa, i pou tou dimoun dan sa biznes. Alor sa osi i enportan. I permet zot, vi ki zot ankor la, donn en servis *spare parts* ek

maintenance, parske zot ankor la. Sa osi i enportan.

E mon krwar an menm tan i permet *trade* kontinyen marse. Parske ou bezwen renouvle serten keksoz avek longer di tan. So napa okenn sistenm ki pe al donn deviz serten, en bann pa pou gannyen. Napa sa. Sel keksoz ki pe dir, si ou annan. Ou en biznes ou annan deviz, ou anvi servi li. Napa problemm ou servi li. Ou pa pe vin, pou napa en *queue* kot en bann pou gannyen, en bann pa pou gannyen deviz. Sa i pa ditou leka, e sete pa sa lentansyon. Mersi Mr Speaker.

MR SPEAKER

Mersi Vis-Prezidan. Ankor en kestyon lo 13enm mwan saler. Onorab Pillay ou kestyon i lo la ou?

HON SEBASTIEN PILLAY

Wi mersi.

MR SPEAKER

Ok.

HON SEBASTIEN PILLAY

Mersi Mr Speaker. Mon kestyon i egzaktman lo sa ki Vis-Prezidan in eksplike. Mon krwar Vis-Prezidan avek Minis, zot bezwen fer en zefor pou donn nou en pe plis *figures*.

Akoz zot pe fer bann *statement* zeneral. E zot pa pe tous sa bann *figures*.

Vis-Prezidan ek mwan menm, i *aware* ki i annan 2987 travayer dan *band one*, avek *band 2* nou *salary grid*. FA4JR in fini *capture* tou dimoun ki pe ganny saler *matching* sa enn, akoz ou annan tou sa lenformasyon ler sa bann biznes in fer laplikasyon. Ou devret annan sa.

So i pa en kestyon konfizyon. I en kestyon ou deza annan sa baz *data*. Tou sa ki ou'n ganny demande pou fer se fer en kalkil e dir nou, konbyen pou koute? E si Gouvernman i kapab *afford*? Ou pe donn nou en *blanket statement* an zeneral, kan ou konnen ou annan sa lenformasyon. Nou tou lede nou annan sa lenformasyon Onorab Afif. Akoz nou ki ti travay lo propozisyon *public salary review* pou *respective Caucuses*. Ok?

Yes, ou ek mwan. Ou, ou ti travay pou ou kote. Mwan mon ti travay pou mon kote. I annan 1944 travayer dan *band 4*. Ok? Dan *band 3* tousel i annan 2382. Sa ki nou pe dir se ki dan *band 1*, ek *band 2*. Ler mon pe koz *band* Mr Speaker, se *public service salary table*. I fer provizyon pou bann *bands*.

Band 1 ek *band 2*, i sa 2 *band* ki pli pre. Bann dimoun ki ganny apepre o *maximum around* R6 mil ekek. Se sa ki nou pe demann sa kalkil pou fer. Me pa *brush aside* sa nide zis par dir poudir i kree konfizyon. Akoz ou deza annan lenformasyon pou ou *deconstruct* sa 2 kategori.

Dezyenmman, so dir nou konbyen sa pou arive? E eski zot in fer sa kalkil pou vwar *across* bann diferan *band*? Oubyen zot in konsider zis *bill* total 13enm mwan saler ki pou enkli sa peyman ki zot pou bezwen fer adisyonneman atraver *FA4JR*? Akoz baze lo *figures* ki Prezidan in donnen, si nou tir sa 140 milyon ki vin pou Gouvernman apepre, *then* i vedir ki 13enm mwan saler, si nou pou pey pou *private sector*, se sa ki pou fer li vin sa 560 milyon. So, mon krwar se sa ki zot bezwen kapab klarifye pou nou silvouple. Mersi.

Non Mr Speaker. I annan en keksoz ki Vis-Prezidan in dir ki mon pa kler lo la.

MR SPEAKER

Demann ou kestyon silvouple.

HON SEBASTIEN PILLAY

Mersi. Mr Speaker Vis-Prezidan in koz lo si nou fer en *Policy* nou

aplik li pou tou dimoun. In menm fer serten referans avek kestyon vizavi *forex*. Vis-Prezidan, mon kestyon pou ou i koumsa, sa deviz wi, sa deviz i dan labank, wi i pou en endividi. Ou'n dir lezot endividi pa kapab servi son deviz pou lezot keksoz. La ou'n ouver en kategori. Ou'n ouver en kategori akoz ou'n dir ek sa bann dimoun zot pou kapab par egzanp fer vini transpor. *Ok?*

Kestyon ki mon pe demann ou Mr Speaker, si ou fer en *Policy*, ou dir 13enm mwan saler ou pa pou donn tou dimoun. Pa fer vini loto, ou pou bezwen aplik li pou tou dimoun. La ou pe kre en *subset*. En kestyon ki mon bezwen demann ou Vis-Prezidan, se eski i annan serten endividi ki Gouvernman *LDS* i le satisfer atraver sa mezir *allow* fer vini loto dan pei? Klarifye sa pou nou. Mersi Mr Speaker.

MR SPEAKER

Mersi. Vis-Prezidan.

THE VICE-PRESIDENT MR AHMED AFIF

Mersi Mr Speaker. Mr Speaker lo 13enm mwan, Gouvernman in fer en kalkilasyon ki lo Bidze i kapab ariv ziska R540 milyon. E sa R540 milyon ki Gouvernman napa. Alor, nou

kapab ale fer sa bann kalkilasyon 2900, swa konbyen ti pou arive 13enm saler, pou sekter prive konbyen. Nou kapab fer tousala.

Me tousala i pou fer ou bezwen al depans larzan ki ou napa. E alor i en pwen akademik ki ou pe fer si i pou sa. E nou, nou pe dir annou fer li dan en fason ki pli zis. Parske pou napa sa zafer ki en bann travayer pou gannyen, en bann pa pou gannyen. Nou, nou dir, si anployer i santi i anvi peye, i lib pou li peye. Me i pa pou vin en lobligasyon lo en dimoun ki bezwen peye ki napa sa larzan. I napa sa larzan, e sa ki nou bezwen konpran.

I napa sa larzan pou li peye. E sel fason ki pe nobou pey depans ozordi, se prete. E ler ou prete, ou pe pret swa ek Labank Santral. Ki vin parey ou pe enprim ou prop lanmonnen. Oubyen ou al pret avek en Labank Komersyal ki ou bezwen rann, e ki fer lenterer monte. Ki fer kou lavi monte.

Alor ozordi Gouvernman in pran en desizyon tre senp. E i pe dir sa 13enm mwan, i pa kapab *afford* ozordi.

Lo kote transpor, mon pa trouv sa koneksyon ki enn i, konmsi zot lye ek kanmarad. Sel keksoz ki Gouvernman pe dir, i pe permet bann dimoun

ki annan son deviz pou kapab *trade*. E fer vin en lot. Se tou ki i pe dir. I pa pe fer okenn diskriminasyon, parske ozordi i annan dimoun ki *earn* an deviz. E in deza *earn* an deviz. Sa i ti son fason fer biznes. Sa mezir i permet ki biznes ki kontinyen roule. Permet ki dimoun i kontinyen reste anploye.

Parske ou pou annan, e i permet osi annou pa bliye. Lo transpor i annan en *tax* ki sibstansyel. I permet Gouvernman osi anmas reveni. Alor i pa'n ouver laport konpletman. Me i en komansman pou kapab soulaz en pe sa sekter ki dan en pozisyon ase difisil.

I soulaz en pe Gouvernman ki li osi i ganny reveni. E i permet resours pei, ki ozordi i anmare pa kapab servi. Ki ganny servi dan en fason kot anplwaye i annan son *job*. Deviz i *flow*. Pei i kontinyen fonksyonnen. I osi senp ki sa. Mersi Mr Speaker.

MR SPEAKER

Mersi Vis-Prezidan. Si zot annan lot kestyon lo 13enm mwan saler, i pou bezwen vin apre. Mon pou prezan pas lo Onorab Wavel Woodcock.

HON WAVEL WOODCOCK

Mersi Mr Speaker. Mon kestyon i *comme* swivan;- VP, Prezidan dan son ladres ti koz lo *post DA*. E dan lepase *DA* ti toultan en *post* politik, kot a plizyer repriz zot ti ganny apwente par Gouvernman, pou fer bann travay politik. E nou'n vwar bann *DA* dan lepase pe *campaign*. E zisteman Praslin ti annan en *DA* ki ti pe *campaign* avek Minis ki ansarz pou *welfare*.

E dan lepase i annan konsern ki bokou ka bann *DA* in viktimiz bann dimoun, akoz zot ti pe swiv lord parti politik. E ozordi nou annan bann *ex DA* ki *MNA* dan Lasanble Nasyonal lo lot kote latab. Alor mon kestyon, ki garanti ki ou Gouvernman pe donner pou garanti ki sa pa pou zanmen repet ankor dan nou pei? E ki bann kriter kler ki pou ganny servi pou swazir bann *DA*, pou apwent bann *DA* dan lefitir?

E dezyenmman Mr Speaker, Prezidan in dir ki nou lekonomi i dan mal, e reveni ki pou antre dan pei in diminyen. Minis, angiz pou anmas plis reveni Sesel kot i konsern *tax evasion*, kot i konsern *tax* ki pa pe ganny kolekte. Dan lepase in annan deba lo plizyer lakonpanyen biznes, ki pa pe pey *tax*, ki ti'n ariv plis ki R1 bilyon.

Nou'n koz lo bann laboutik *retailers*, Lakonpanyen Telekominikasyon, bann parti politik parey *US*, ki ti dwa 38 milyon *tax*, ki zot in fer lo *rent* avek *STC*. Ki sistenm ki zot pou met an plas pou fer sir ki tou *tax* i ganny anmase?

E finalman, Prezidan in koz lo relasyon avek bann pei zanmi. In mansyonn rod lasistans pou plizyer proze. Minis, par lefe ki dan lepase plizyer finansman ki Sesel ti gannyen avek bann pei zanmi, swa in disparet, (parey sa \$50 milyon) larzan Gouvernman *Kuwait* pou fer Lekol La Rosière ki nou pa konnen ki'n arive avek, kot in ale. Koripsyon dan larzan delo malpropte La Misère.

Bokou pei ozordi pa tro fye Sesel. Akoz dan lepase in annan bokou lanmen long!

MR SPEAKER

Kestyon Onorab silvouple.

HON WAVEL WOODCOCK

Mon kestyon. Ki ou Gouvernman pe fer pou repar relasyon avek bann pei zanmi, pou ki nou kapab ganny plis lasistans enternasyonal? Mersi.

(APPLAUSE)

MR SPEAKER

Mersi. Eski mon krwar kekfwa i annan kestyon ladan ki Vis-Prezidan ti a kontan adrese plito? E apre Minis Finans. Vis-Prezidan.

THE VICE-PRESIDENT MR AHMED AFIF

Mersi Mr Speaker, i annan 3 kestyon. Enn konsernan *DA*. Lot konsernan peyman *tax*. E trwazyenm en pti pe lo bann *Grants* ek *donations*.

Lo kote *DA*. Sa ki kler se ki sa Gouvernman i pou tir politik dan Gouvernman. Sa i kler sa. E i kler osi ki sa ki nou ti annan se en sistenm kot politik, sirtou lo kote *DA* ti for dan Gouvernman. E alor Onorab mon antyerman an akor avek ou, ki sa i bezwen sanze. E sete pou sa rezon ki Prezidan Ramkalawan ti mansyonn sa size *DA*, e sa nesesite pou nou tir politik dan Biro Ladministrasyon.

Sete enn sa bann rezon osi ki ti dir, e i krwar poudir sa napa naryen pou fer avek sa size *delinking*, ki in deza ganny koz lo la. Parske en *DA* i sipoze deservi tou dimoun. E resaman nou'n vwar bann *DA* ki ti pe dir i pe servi tou dimoun. Me zour eleksyon sa *DA* i en *polling agent* pou en parti politik.

En *polling agent* i vedir ou pe azir pou ou parti. Mon ti a konpran si i ti azir pou *Electoral Commission* enparsyal. Me i pe azir pou en *political party*. Ki montre ou koman en *DA*, sa dimoun i annan en for afilyasyon dan politik. E son fason fer i ganny enfliyanse par son aktivite politik. Ki sa i en keksoz ki mal.

(Interruption)

MR SPEAKER

Lord silvouple.

THE VICE-PRESIDENT MR AHMED AFIF

Be sa ki nou, nou pe dir nou bezwen tir okenn fason fer politik dan travay *DA*. E anefe mon ti a demann petet bann Manm ozordi si zot annan, Lasanble Nasyonal, si zot annan propozisyon vizavi lafason ki nou devret apwent *DA* apartir la. Kot nou pe bouz devan. Enn bann fason ki Prezidan ti mansyonnen, sete ki bann *DA* i ganny zot travay atraver en proses *interview*.

Setadir kot i annan en *panel* ki enparsyal. Ki regard vremen ou konpetans vizavi *management*. Vizavi enplimant proze, vizavi konn ou distrik. E rezourd problenm. Se en pti pe sa kriter. Alors si ou kapab

ganny bann dimoun. E i posib ki sa bann ki deza la, i ava *apply*. Zot osi zot a ganny konsidere.

Me sa ki Prezidan ti dir, fodre napa sa kestyon ki monte dan sa prosis *interview*. Kot ou pou demann li, be ki parti politik ou afilye avek? Sa i pa devret en kriter. E alor nou devret annan bann *DA* ki demontre par lafason zot fer keksoz, ki zot azir dan en fason enparsyal. E se sa ki nou anvi anmennen. Se sa ki nou anvi anmennen kot tou dimoun i santi poudir si i pou al devan en *DA*, i pou ganny en lasistans.

I pou ganny sa servis. E sa servis pa pou annan sa *task* politik avek. Ki pou dir be li i sorti dan en parti, alors nou pa pou ed li. Nou bezwen sanz sa kiltir. E zis pou mansyonnen osi ki ler nou pe anmenn en *MNA* dan ladministrasyon, dan sa biro, sa *Community Centre* oubyen Ladministrasyon Distrik, se pa pou fer politik, se senpleman sa dimoun in ganny elekte dan sa distrik. Ler i pou vin dan sa distrik i pa pou met en paviyon son parti politik anler. Se paviyon Sesel ki flote anler.

Sa *MNA* i reprezant tou son dimoun. E nou dan en peryod difisil. Nou anvi fer lekonomi. En *building* i deza la,

fasilite i deza la. Ki i kout nou, pou fer sa *MNA* ganny en biro dan sa landrwa? Kot parey sa *DA* pe deservi tou dimoun, i annan en rol, en fonksyon. Sa *MNA* i annan en rol en fonksyon. I osi i asiz la, e koman en pti pei ou annan ou *MNA* ek ou *DA* o bor kanmarad pe travay. Be pa i byen? Pa i normal? Ki i annan mal ladan?

E nou sov larzan dan Bidze. E an menm tan pei i bouz devan, dan en fason sivilize kot nou fer lekonomi an menm tan. Mersi Mr Speaker.

MR SPEAKER

Mon krwar Minis pou adres ankor kestyon.

MINISTER NAADIR HASSAN

Mersi Mr Speaker. Mersi Onorab pou ou kestyon. So sa *issue tax* i annan 2 eleman ladan. I annan ou bann Polisi e Lalwa *Tax*. E i annan *efficiency* dan koleksyon *tax*. So, mon a adres sa 2 *issue* separeman. Ki mon'n remarke dan nou Lalwa *Tax*, i annan bann Polisi ladan ki fer li pli fasil pou serten biznes pa pey *tax*. So, zot pa deklar en profi.

E i annan louvraz ki *PS* in komanse pou regard sa. I annan en *proposal* ki pe al ganny met devan *Cabinet* soon. E i pou ganny diskite avek

sekte prive, ki pou tir sa bann *loophole* ki i annan serten sekte ki pa pe *tax*. E sa mon krwar i ava ogmant kontribisyon *tax* ki Gouvernman i anmase. I retir sa bann *loophole*.

Dezyenm eleman se *tax collection*. E annefe semenn pase mon ti annan en *meeting* avek Konmisyoner *Tax*. E in eksplik mwan bann *challenges* ki zot annan. I bann *challenges* Resours Imen, bann *challenges* teknolozi, osi ki pou ed kot *SRC* pou anmas zot bann det *tax*, dan en fason pli efikas. E Komisyoner *Tax* pou donn mwan en plan stratezik dan sa *next* mwan ki vini. Ki bann reform koleksyon *tax* ki i santi.

E i *driven for* sa bann koleksyon *tax* par adopsyon teknolozi, pou fer sir ki nou vin pli efikas dan koleksyon *tax*. E ler sa bann mezir in pare, nou a fer en lanons. Me pou konklir lo ou kestyon se ki wi, i annan en louvraz ki'n ganny fer pou fer sir ki nou Lalwa *Tax* i *up to date*. E napa sa *tax's avoiders* ki pe arive. E lo lot kote nou pe fer kot *SCR* vin pli efikas dan koleksyon *tax*. Mersi.

MR SPEAKER

Vis-Prezidan ou ti a kontan adres son trwazyenm kestyon?

THE VICE-PRESIDENT MR AHMED AFIF

Wi lo trwazyenm bout, lo kote bann donasyon ki sorti kot Lanbasad. Pa Lanbasad, bann pei zanmi e lezot sours. Sa ki mon ti a kontan dir ou Onorab se ki, sa Gouvernman anba direksyon Prezidan Ramkalawan, pou fer sir ki tou don ki gannyen i vin en benefis pou pep Seselwa.

Sa Gouvernman anba direksyon Prezidan Ramkalawan, pou fer sir ki i annan *accountability*, latransparans dan lafason ki keksoz i ganny fer. Byensir si en dimoun i fer en kontribisyon i demann reste *anonymous*, napa problem ek sa. Me nou bezwen fer sir nou rol se nou konnen lekel sa dimoun. Ki nou, nou pa pe ankouraz dimoun ki vini, ki napa en repitasyon, ki pa bon. Nou bezwen fer sir sa nou.

Selman primordyal se ki okenn donasyon ki ganny donner, i ganny fer piblik, par egzantp nou pe ganny en donasyon pou bann vaksinasyon. Nou fer tou dimoun konnen i pou annan, en donasyon ki pe vini. E sa donasyon i pou ariv kot pep Seselwa. Sa bann zafer larzan ki'n antre, ki Gouvernman in reklanmen in antre, me apre ou

pa war, i pa dan liv. Sa anba direksyon Prezidan Ramkalawan pa pou arive sa!

(APPLAUSE)

THE VICE-PRESIDENT MR AHMED AFIF

E in anmenn en lalit. Mon servi sa mo asarnen. Pou fer sir ki koripsyon dan Gouvernman nou elimin li. Nou elimin li, nou minimiz li. E ki sa Gouvernman i delivre selon lekspektasyon pep Seselwa. Mersi.

MR SPEAKER

Mersi. A se pwen mon krwar nou a *break*. E nou a retournen 11.10.

(BREAK)

MR SPEAKER

Krwar avek bann Manm ki'n antre i sifizan, mersi. *Ok*. o bon, sa ki mon pou sey fer se mon pou rebran mon lalis. E sirtou sey ratrap bann ki'n lev zot lanmen boner. E zot kestyon i kapab nenport lo nenport size ki zot ti'n *plan*. E premye se Onorab Kelly Samynadin.

HON ROCKY URANIE

Mr Speaker?

MR SPEAKER

Onorab Uranie. Wi.

HON ROCKY URANIE

Mr Speaker mwan mon oule *raise en matter of privilege*.

MR SPEAKER

Ale nou a ekout ou.

HON ROCKY URANIE

Mr Speaker ki mon pe resanti, ki koman Manm Elekte pou Zil Pros, ki Prezidan in vin koz lo respe. Ki koman mon komans koze pou mwan fer mon liberasyon, mon santi ki bann Manm lot kote pa pe vremen donn sa respe ki i devret. So, mon ti a kontan petet si ou ...

(Interruption)

MR SPEAKER

Silvouple.

HON ROCKY URANIE

Parey la ankor Mr Speaker. Ou vwar ankor parey?

MR SPEAKER

Wi.

HON ROCKY URANIE

So petet mon ti a kontan ou pran sa. Mersi Mr Speaker.

MR SPEAKER

Wi mon kapab dir keksoz lo la. Onorab Uranie sa i en keksoz ki tou lede kote i fer. E mon ti a demann tou lede kote pou evite silvouple. Annou pa enteronp en dimoun ki pe koze. Mersi. Onorab Kelly Samynadin poz ou kestyon.

HON KELLY SAMYNADIN

Mersi Mr Speaker. Bonzour Minis, Vis-Prezidan, tou Manm e lekout e tou dimoun a lekout. Mon premye kestyon. Prezidan in a firmen ki lanfaz restriktirasyon Minister Lafanmir, pou lo prevansyon ledikasyon ek devlopman kapasite. E pou sa materyalize i pou annan bann program ki pou ganny met an mars par sa Minister. Eski Vis-Prezidan i kapab eksplik sa Lasanble lo ki plan, ki plan Gouvernman vizavi sa restriktirasyon?

E mon dezyenm kestyon, ki plan Gouvernman sa ki konsern *retention* plis ansennyan Seselwa, an vi ki sa Minister i anploy en gran poursantaz *expatriates* dan sa pos pou ki a la *fin* sa i ava ede retir presyon lo nou rezerv deviz. Mersi.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Mr Speaker. Bonzour ankor tou bann Manm Onorab e tou dimoun a lekout. Onorab Samynadin lo sa kestyon spesifik ki bann program spesifik, mon napa lenformasyon la an se moman.

Parey ou konnen i annan sa Minister li menm, ki pe travay pou kapab prodwir sa bann program ki vreman pou met lazenes, lafanmir e tou dimoun devan dan tou sa ki nou fer e promouvwar bann bon valer.

Me mon asire i kapab annan loportinite kot Minis ki pou responsab, i ava vin donn sa bann detay. E si ou kapab zis reponn sa, zis dir mwan sa dezyenm parti ou kestyon?

HON KELLY SAMYNADIN

Mon dezyenm, dezyenm parti mon kestyon i annan pou fer avek *retention* plis ansennyan Seselwa.

THE VICE-PRESIDENT MR AHMED AFIF

Ok. Pou an se ki konsern *retention* Seselwa, byensir, Mon premye *Statement* se ki nou valoriz bokou e nou konn lenportans pou annan bann *teacher* dan nou sistenm Ledikasyon.

Mon krwar sa i pou osi egalman en kestyon ki Minis Responsab pou Ledikasyon i kapab koz lo la. An gro mon kapab dir poudir i pa pou zis en kestyon *Scheme* ek kestyon Saler. Me kestyon lanvironnman travay, sa lanvironnman ki permet ki bann *teachers* i santi zot konfortab, pou zot kapab delivre lo sa ki lekspektasyon etidye, paran e kominote i espekte de zot.

So i en keksoz ki nou pare pou revwar e pou fer sir ki sa ki vin an plas i pli bon ki sa ki la ozordi. Mersi Mr Speaker.

MR SPEAKER

Mersi Vis-Prezidan. Onorab Johan Loze.

HON JOHAN LOZE

Mersi Mr Speaker. Mr Speaker mon ti a kontan demann Vis-Prezidan si i kapab konfirm avek Lasanble, konmkwa ki depi mwan, depi li, depi Prezidan Ramkalawan nou'n fini tous nou *end of year* depi Zanvyé ziska Out.

E ki aprezan nou ki'n fini tous nou *end of year* de Zanvyé a Out, nou pe prononse ki konmkwa napa larzan pou bann *carer* tous pou zot. Mersi Mr Speaker.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Mr Speaker. Mr Speaker sa ki Prezidan in anonse se ki sa ki pe ganny afekte, se sa bann pozisyon e sa bann peyman ki annan pou fer avek *end of term* apartir la.

Savedir depi la si pou napa 13enm mwan, tou dimoun pa pe ganny 13enm mwan. Me apartir la sa bann benefis spesifik ki'n koz lo la apartir la zot pa pou peye. So se vreman sa, i tre senp. E mon pa krwar in dir okenn keksoz ki konplike, ki konplik lavi lafason konpran li. Mersi Mr Speaker.

MR SPEAKER

Mersi Vis-Prezidan. Onorab Regina Esparon.

HON REGINA ESPARON

Mersi Mr Speaker, bonzour tou dimoun. Mr Speaker,

(Off-Mic)

HON REGINA ESPARON

Onorab ou'n fini ganny ou sans. Onorab les mwan koze Onorab.

(Interruption)

MR SPEAKER

Onorab Loze mon krwar in reponn ou kestyon. Mon pas lo Onorab Esparon.

(Interruption)

HON REGINA ESPARON

Onorab silvouple, les mwan koze.

MR SPEAKER

Mersi.

(Interruption)

HON REGINA ESPARON

Mersi Mr Speaker. Eski Minis i kapab.

MR SPEAKER

Lord silvouple.

HON REGINA ESPARON

Dir sa Lasanble, an sa ki konsern lasistans kot Lazans Proteksyon Sosyal, landrwa ki annan plis labi, e sirtou an sa ki konsern kart *STC* ki pe ganny servi an se moman.

Kot i annan dimoun ki pe abize e vann sa kart pou ganny drog ou lalkol olye aste manze. E i menm annan ki pe aste lo sa kart apre vann sa bann keksoz lo geto pou ganny larzan. Ki

nouvo stratezi ki zot anvizaze met an plas pou anpes labi?

E kot sa dimoun ki bezwen ganny son larzan dan son lanmen, e i kapab triyange kot i pli bonmarse, olye esper zis sa kart *STC* pou li kapab aste avek. Mersi Mr Speaker.

MR SPEAKER

Mersi Onorab. Minis oubyen *VP*. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Wi i en, i annan an se moman en odit ki bann departman relevan pe fer. Kot *ASP*.

E i osi annan en konversasyon avek Minister relevan lo bann diferan *Schemes* ki an plas anba *ASP*. E ki mannyer ou kapab rasyonaliz sa bann diferan *Scheme* e osi redwir *scope* pou fer labi. So sa i en konversasyon ki Minister Finans ansanm ek Minister kot Sosyal pe regarde. E *as soon* ki i annan bann mezir spesifik, sa Minis konsernen i ava anonse. Mersi.

MR SPEAKER

Mersi Minis. Onorab Rosie Bistoquet.

HON ROSIE BISTOQUET

Bonjour Mr Speaker, bonjour Minis, bonjour Vis-Prezidan, bonjour tou Onorab e bonjour tou dimoun ki pe ekoute dan lakour. Mr Speaker mon annan 2 kestyon, 3 kestyon, me selman i *more or less* 2.

Enn dan depans ek reveni, apre 2 dan Lasante ki *merge* ansanm. Lo kote depans, konbyen Gouvernman, Minis konbyen Gouvernman in depanse avek lakaz lwe par lannen, pou bann dimoun ki travay dan Gouvernman?

Vi ki nou dan en kriz ekonomi, eski nou bann depans, sa bann depans i kapab ganny redwir? Sa i en kestyon.

Lot kestyon, i konsern lopital La Digue. Annefe mon'n santi poudir lo lot kote latab i annan de pwa de mezir vizavi konsernan lasante Digwaz. Mon pou demann en premye kestyon, konbyen letan Minis, eski bann Digwaz in esper sa nouvo lopital avek sa servis modern? Apre ki benefis i pou anmennen pou bann zabitan laba? E an menm tan ki benefis finansyel ki pou anmennen pou Gouvernman?

Mon lot kestyon i baze lo sa vaksen ki Prezidan in nonmen bomaten yer. Konsernan sa vaksen

MODERNA. I en lakonpanyen vaksen ki mon'n konpran poudir son sef *CEO* Tal Zaks, in dir ki sa vaksen i pou donn zis 1 doz. E son doz i annan en *immunity* apepre 95poursan.

E sa i pe donn li pou permanan. Mwan ki mon ti a kontan demande mon kestyon, eski Gouvernman pe mazin met en lot kou adisyonnal si an ka nou popilasyon i bezwen plis ki 1 doz.

Mon pa konnen, akoz i annan vaksen i annan 2 doz, 3 doz pou donn plis liminite 100 poursan nou popilasyon Sesel. Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab. Lo ou premye kestyon, ki kantite ki Gouvernman pe depanse lo bann lakaz lwe. *Figure*, mon kapab donn ou en *figure approximate*. Me selman pli tar mon a donn ou *figure* pli egzakt. *Figure* ki mon'n ganny *provided* avek se ki *approximately*, nou pe depans apepre R50milyon par lannen lo bann lakaz lwe.

E sa i plis lo kote pou *accommodate* bann dimoun dan Ledikasyon e Lasante. E baze lo sa wi, i annan sa legzersis ki

PS pe fer pou regard *scope* ki mannyer nou kapab redwir sa kou *as part of* nou Bidze 2021.

So mon mazine i ava annan plis detay ler nou fer deba lo Bidze 2021. Lo kote Lopital La Digue, i paret mwan i annan plizyer lannen depi ler sa *issue* lopital La Digue i lo latab.

E lo kote ki benefis i anmennen, mon krwar zot bann benefis i *obvious*. Se ki La Digue avek sa popilasyon ki i annan, e osi kantite touris ki vizit La Digue. I kritik ki La Digue i annan en fasilite medikal ki ase lo standar. Mwan menm mwan plizyer fwa mon'n al kot Lopital La Digue, e son leta ti ase deplorab.

E mon krwar poudir ki i annan en *need urgent* pou lopital La Digue e Digwa, menm zot ti vreman konsernen kantite dega ki ti pe pran pou ganny lopital La Digue. Mersi.

MR SPEAKER

Mersi Minis. Onorab Doyace Porice.

HON DOYACE PORICE

Mersi Mr Speaker. Bonzour a tous. Parey nou tou nou'n tande, Prezidan Ramkalawan in anonse ki pou sa lannen pou napa 13enm mwan saler, eski Minis Finans

i konfirmen ki ler nou lekonomi i vin stab, travayer pou reganny zot 13enm mwan saler? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Speaker. Mersi Onorab pou ou kestyon. Wi, ler lekonomi i *pick up* nou'n *recover*, sa 13enm mwan saler ava ganny rekonsidere pou *provide* Seselwa avek en 13enm mwan saler. Mersi.

MR SPEAKER

Mersi Minis. Onorab Lemiel.

HON SYLVANNE LEMIEL

Mersi Mr Speaker. Bonzour tou dimoun. *VP*, mon ti a kontan konnen avek lanons ki'n ganny fer konsernan sa 2 Lanbasad ki pou ganny frenmen. Eski sa 3 Lanbasad, ki ti zot kou loperasyon? Eski zot kou loperasyon i pli o pou *manage*? Ti a bon ki nou Lasanble osi i ganny en kontrandi lo *operating cost of* sa 3 Lanbasad. Ki laranzman ki pe ganny fer pou nou bann etidyan, ki annan 11 zot an tou, ki pe etidye *Cuba*?

MR SPEAKER

Ok.

HON SYLVANNE LEMIEL

Sa, non. Mon annan ankor kestyon.

MR SPEAKER

Ou annan ankor kestyon Onorab.

HON SYLVANNE LEMIEL

Wi.

MR SPEAKER

Ankor 1?

HON SYLVANNE LEMIEL

Non Mr Speaker i pa ankor 1. Akoz taler mon ti lev mon lanmen letan nou ti pe koz lo lofis *DA*, *MNA*, mon ti annan en kestyon swivan. Mon pou bezwen demann li la.

MR SPEAKER

Demann li wi.

HON SYLVANNE LEMIEL

An sa ki konsern *MNA* annan en lofis dan Biro Ladministrasyon Distrik. Ki arive avek bann *MNA* ki deza annan zot lofis?

Ki desizyon ki Gouvernman pe pran konsernan bann ki deza annan zot lofis? Ki laranzman ki pe ganny fer, pou, kot bann *DA*. Par egzamp letan i annan serten ki'n al vizit, i annan

Ladministrasyon Distrik ki kwense.

Zot napa en lofis. Eski sa *DA* pou *vacate* son lofis avek son tim pou li donn sa *MNA* ki pe vini ek son? Mon kestyon *VP* i a reponn. Mersi. Eski *VP* ou pou kapab dir nou, si nou pe demann *DA* pou *vacate* son lofis pou donn *MNA* ek son Clerk sa lofis dan *DA's Office*? Apre mon ti a kontan konnen si sa wi i pou arive, parey i annan serten *MNA* lot kote latab pe dir *yes*.

Kote ki li sa *DA* avek son lekip nou pe mazin donn li en lot lofis, pou li desarz son responsabilite? Lot kestyon.

MR SPEAKER

I fer 4 la Onorab.

HON SYLVANNE LEMIEL

Mr Speaker, permet mwan demann mon kestyon. Mersi. Eski Gouvernman dizour Mr *VP*, Onorab *VP*.

Eski Gouvernman Dizour pe mazin al sanz Konstitisyon lo lekel dimoun ki kapab debout koman en kandida dan Lasanble Nasyonal a lavenir?

Mon konsern i se ki i paret mwan ki si ou'n en *DA*, i paret mwan i en problem konmsi si ou debout dan en eleksyon. E apre dan dernyen eleksyon *VP*, dapre ou larepons ki ou'n donner. Ou'n dir ki ti

annan serten *DA* ki ti *polling agent*. Par kont nou'n war en kantite travayer servis piblik ki zot ti *polling agent* e ki ti pe fer konpany partou dan distrik zot osi. Me zour eleksyon zot ti *polling agent* zot osi.

Eski Lalwa pou aplik pou tou dimoun prezan, *DA* ou en servis piblik ou osi, ou en servant Lepep. So eski nou pe dir ki ler ou'n en *DA*, ou napa drwa ou partisip dan lavi politik dan ou pei? Mersi. Dernyen, en pti leklersisman.

MR SPEAKER

Eskiz mwan, eskiz mwan Onorab Lemiel.

(Interruption)

MR SPEAKER

Les, mon a eklersi en pwen. Mon a eklersi en pwen. Si ou annan plizyer kestyon, ou bezwen permet *VP* oubyen Minis reponn serten.

Ziskan konmela mon'n al lo 3. So nou aret lo 3, apre ler lezot dimoun i an ganny sans demann kestyon, ou a kapab relev ou lanmen ankor silvouple, *ok?*

HON SYLVANNE LEMIEL

Mersi.

MR SPEAKER

Mon a demann *VP*. Mon a demann *VP* pou adres bann kestyon ki'n ganny leve.

THE VICE-PRESIDENT MR AHMED AFIF

Mersi Mr Speaker. Onorab mon pou komans avek Lanbasad, ou kestyon. Sa 3 ki'n ganny mansyonnen dan diskour Prezidan sete *Cuba, Sri Lanka e Geneva*.

Ou'n demann mwan kou, sa sif ki mon'n ganny donner ek Minister Finans i apepre nou napa detay pou sa 3. Me anviron R5milyon par Lanbasad par lannen. Savedir si i pou 3 i vin R15 milyon.

So \$750 mil ki'n ganny sove toudswit. E nou krwar an relasyon avek ou dezyenm kestyon, kot eski sa i pou annan en lenpak par egzant lo etidyan ki dan bann diferan? Me i pa zis etidyan, i osi par egzant si dimoun pe al tretman eksetera an *Sri Lanka*. E larepons i tre kler.

Gouvernman pou fer sir ki tou bann aktivite ki Seselwa ti abitye fer atraver sa bann pei, i pa ganny afekte dan en fason ki pou fer lavi vin dir, ouswa sa etidyan, oubyen vwayazer dan sa pei.

Pa bliye poudir bokou lannen etidyan in al *Cuba*, ti napa Lanbasad. Zot ti ale, zot

ti vini, tou keksoz ti mars relativman ase fasil. E ozordi nou a fer egzakteman sa. Me selman nou pou sov R5milyon dan nou Bidze dan sakenn sa bann landrwa. Kot i konsern *MNA* e rol *DA*, le pwen esansyel, le pwen esansyel se sa *DA* ozordi i bezwen reste. Parske sete sa son biro ki i ti ganny *allocate*.

Alors sa ki mwan mon konpran se Gouvernman ti pe rod fason pou ki dan bann lenstans kot biro ti ase gran e ti bezwen kapab ganny en *MNA* ladan.

Zot ti a fer provizyon pou sa arive. E dek ki sa i arive, *then* nou pe ganny en lekonomi dan lafason nou pe kapab servi resours Gouvernman pou deservi sa *MNA* ek sa *DA*.

Mon pa krwar i annan okenn kestyon ki nou, nou pe al pous en *DA* avek son *staff* e pou napa, fodre napa sa bann kalite panse. Parske.

(Interruption)

MR SPEAKER

Silvouple.

THE VICE-PRESIDENT MR AHMED AFIF

Parske i posib i annan serten problem administrativ,

i annan serten persepsyon otour serten dimoun.

E i anmenn mwan lo trwazyenm kestyon e konsernan kriter ki bann *DA* i servi. E pou mwan i tre senp. Rezon mwan mon ti mansyonn, mon ti mansyonn sa zafer en *DA* ki afilye avek en parti politik, se parske i annan serten pozisyon. Nou selman dan Egzekitiv, me dan Zidisyer oubyen dan Lezislatif. Kot tou dimoun i espekte en nivo enparsyalite. Zot ekspekte.

I annan serten pozisyon dan Gouvernman, ki sa bezwen pou annan sa enparsyalite i pa sitan evidan dan sa travay ki ou pe fer.

Me dan travay en *DA* kot ou pe zwenn piblik, e kot dan lepase listwar in montre nou in tre politisizye. Se dan sa bann landrwa ki nou krwar ozordi si nou anvi anmenn en transformasyon e anmenn konfyans avek Seselwa.

Ki nou pe tir politik ladan. Se la kot nou, nou krwar bann *DA* ki annan en listwar ki zot pe montre en afilyasyon politik. I bezwen fer lekotrer pou montre poudir pou nepli annan.

E se sa rezon ki Prezidan Ramkalawan i panse, poudir nou pa devret frenm laport avek nenport ki. Zot annan drwa pou zot *apply* pou sa *job*.

Me selman zot bezwen demontre atraver lafason zot fer keksoz, ki apartir la, nepli annan politik dan travay *DA*. E se sa, se sa, sa laliny ki nou bezwen desinen, par ler pou annan serten post ki en pti pe pli kritik ki lezot.

Be selman dan sa, nou, nou krwar *DA* pa devret zwe politik, dan Biro Administrasyon pa devret annan politik. E tou dimoun i deservi pep Seselwa. Mersi Mr Speaker.

MR SPEAKER

Mersi. Nou a pas lo lot dimoun. Tou ou kestyon i enportan Onorab Lemiel. Ale.

THE VICE-PRESIDENT MR AHMED AFIF

Mersi Mr Speaker. Bann *MNA* ki deza annan en biro, si i annan posibilite pou zot servi, deservi, ganny fer zot fonksyon dan en landrwa kominoter kot Biro *DA*, *then* mon pa war akoz zot devret kontinyen lwe en biro e fer li.

Parske si zot ganny sa sans. Me parkont si sa posibilite dan zot distrik pa egziste, *then* mon mazin, antretan ki Gouvernman pe fer provizyon pou donn zot, li i ti mazin dan biro *DA* pou annan antretan zot kontinyen

avek sa laranzman ziska ler nou trouv en lot solisyon. Mersi.

MR SPEAKER

Mersi. Mon a fer bann Onorab remarke ki si zot kestyon pa ganny leklersisman satisfesan, i touzour annan zot posibilite pou zot repoz kestyon pou bann Minis, ki kapab re adres sa bann size. Mon a pas prezan lo Onorab Naddy Zialor.

HON NADDY ZIALOR

Mersi Mr Speaker. Bonzour tou dimoun. *VP* avek Minis, an relasyon avek asire ki tou dimoun i reste dan zot lanplwa, a plizyer repriz nou'n mansyonn bann program anba *ASP*.

Petet mon pa konnen si a sa moman la i ideal pou Minis petet dir nou. An se ki konsern bann program an relasyon avek Lanplwa, ki kantite larzan ki'n ganny depanse?

E an menm tan reasir piblik, parske i annan en serten politik ki pe ganny fer la, ki sa bann program pe arete, oubyen pou arete, reasir piblik ki program i kontinyen, malgre nou dan difikilte ekonomik. Mersi Mr Speaker.

MR SPEAKER

Mersi Onorab. Minis.

MINISTER NAADIR HASSAN

Mersi Speaker. Mersi Onorab. Onorab kekfwa ou ti a zis klarifye ler ou pe dir bann program Lanplwa ki egzaktman ou ti pe *refer to*?

HON NADDY ZIALOR

Avek ou permisyon Mr Speaker, anba *Welfare* ou annan bann program ki direk, ki ganny kadre atraver Departman Lanplwa. Sa i konpri *My First Job, URS, Skill Development Program* e en bout petet ki mon pa'n tann masyonn bokou lo la, sa program *SETS*.

I pa lye ek *Welfare* direktman. Me selman sa 3 program li menm, ki kantite larzan depi komansman lannen ziske la nou'n depanse? E ki plan a lavenir? Mersi.

MR SPEAKER

Mersi.

MINISTER NAADIR HASSAN

Mersi Speaker, mersi Onorab. Mon a donn ou sa *figure* kantite depans en pti kou. *PS* pe tyek sa *figure*. Me selman an gro, wi bann program pou kontinyen.

Bann program pou asiste bann pli vilnerab pou kontinyen. Me selman parey mon'n dir oparavan, nou

bezwen met an plas bann mezir ki anpes labi dan bann program sosyal.

E osi mon'n mansyonnen avan, se ki i enportan ki tou dimoun ki kapab travay e i annan en lanplwa i bezwen travay.

E mon krwar sa i mesaz osi ki Prezidan ti pase yer. Savedir, wi. Onorab sa *figure* mon a donn ou en pti pli tar sa *figure, PS* pe tyek *the exact amount*.

Me selman an gro wi, bann program pou kontinyen. Me selman plis mezir nou anpes labi. E ki sa bann ki bezwen lasistans ki pe ganny ede. E sa i an gro, wi repons pou ou kestyon. Mersi.

MR SPEAKER

Mersi. Onorab Desheila Bastienne.

HON DESHEILA BASTIENNE

Mersi Mr Speaker. Bonzour Minis, delegasyon, bonzour tou dimoun a lekout. Mr Speaker vi ki dan zil Perseverance i napa okenn lenfrastruktir pou le moman, e ki apre tou sa lannen plis ki 10an, tou bann biro Gouvernman enkli Biro Ladministrasyon Distrik pe okip bann lakaz.

E i enportan note Mr Speaker ki sak sa bann biro pe okip 2 lakaz ansanm. Mon kestyon i koumsa, eski Minis i kapab dir sa Lasanble, ki plan imedya pou an batiman kot sa bann biro a ganny son vre lokasyon apropiye, enkli Biro DA ek osi en Sant Kominoter? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Speaker. Mersi Onorab pou ou kestyon. Wi sa i en diskisyon ki pe arive avek Minister *Local Government*. Ki pli tar nou ava fer lanons ki bann mezir ki pou ganny met devan, pou adres sa *issue* spesifik ki ou'n mansyonnen. Mersi.

MR SPEAKER

Mersi. Wi Onorab.

HON SEBASTIEN PILLAY

Mersi Mr Speaker. Mon oule *draw* ou latansyon otour *order 61(d)*, e mon oule sey konpran en keksoz.

Ler en kestyon i ganny demande avek Minis, mon konnen poudir Minis pa sipoze reponn. Be kestyon ki Onorab Zialor in poze, menm kestyon ki'n ganny poze lo sa kote, lo

bann lezot program ki asosye avek Lanplwa, *SETS* eksetera.

Be i paret nou zis *brush aside* larepons, nou dir *very briefly* nou koz lo la *and then* nou *move on*. Mon krwar rezon sa sesyon kestyon Minis se pou donn Lepep Seselwa lenformasyon.

Ale get konsern eksetera. So petet sey koriz nou lo si mon mal. Ou pa'n dir nou vremen ki pe arive ek sa bann program, nou'n nonm ou *SETS* taler ou pa'n vremen koz lo la ki pe arive.

So petet ti ava bon ou donn nou, ou pran en pe plis letan pou analiz sa kestyon ler i vin kot ou, *and then* pou reponn sa Manm. *And then* petet Mr Speaker, osi mon oule sey koriz, petet mon'n fer en *misapprehension*.

Eski Onorab Vis-Prezidan pe dir nou koumsa poudir nou pou amande Konstitisyon? Akoz Konstitisyon i kler, lo *freedom of expression regarding* en dimoun, en DA eksetera.

Akoz nou'n vwar sa pandan sa 4an, dimoun in eksprim zot lekor libreman. Eski la safwasi nou pe dir poudir serten dimoun pa pou kapab eksprim zot lekor libreman? E si sa i le ka, petet eksplik nou par egzanp bann landrwa parey CAA, kot nou

annan dimoun ki en, nou annan en dimoun ki en. Non, non.

Be mwan. Non be nou bezwen vini, nou bezwen met li devan Mr Speaker. Be si nou pa met li devan, akòz mon pou met li devan?

(Interruption)

MR SPEAKER

Esper en kou.

HON SEBASTIEN PILLAY

Nou pa kapab koz lo en keksoz, pa koz lo enn. I en laverite.

(Interruption)

MR SPEAKER

Order silvouple!

HON SEBASTIEN PILLAY

Akòz in koz lo bann lenstitisyon.

(Interruption)

MR SPEAKER

Me, order!

HON SEBASTIEN PILLAY

Mr Speaker anba Konstitisyon, anba Konstitisyon i dir poudir i annan en Lalwa dan en pei demokratik ki ava defini ki manner ou egzers ou bann drwa, *ok?* Vis-Prezidan in koz

lo en lenstitisyon ki apel *DA*. Be i annan lezot lenstitisyon.

MR SPEAKER

Wi, wi.

HON SEBASTIEN PILLAY

I annan *Ombudsman*, i annan *CAA*.

(Interruption)

MR SPEAKER

Order silvouple!

HON SEBASTIEN PILLAY

So mon ti a kontan si nou pronons nou lekor lo la.

MR SPEAKER

Onorab mon krwar ou pe servi loportinite pou antrenn lezot size dan sa diskisyon. Selman eski Minis avek *VP* i a kapab zis repas lo sa lesplikasyon, pou satisfaksyon Onorab *Leader* Lopozisyon silvouple. Mersi.

MINISTER NAADIR HASSAN

Mersi Speaker. Mersi Onorab. Mon krwar lo sa *issue SETS*, mon'n adrese sa *issue*. Ki mon'n mansyonnen, mon krwar Onorab Cosgrow ti demann mwan sa kestyon ki lo *SETS*.

E mon ti mansyonnen poudir nou pe regard *SETS*

ansanm avek *FA4JR*, ansanm ek *issue welfare*. E osi mon'n mansyonnen poudir i annan en group ki konpri Minister Finans, ki konpri Minister kot *Social Affairs* ek Lanplwa, ki pe regard *the design of the whole program FA4JR, SETS* tousala ansanm.

E *as soon* ki sa legzersis i konplete, ou a ganny detay en pe pli *in-depth* lo la. Mersi.

MR SPEAKER

Mersi Minis. Mon krwar sa i byen. *VP*.

THE VICE-PRESIDENT MR AHMED AFIF

Mersi Mr Speaker. Zis pou retourn lo pwen Onorab konsernan Konstitisyon e drwa eksetera. Mon pa'n zanmen fer en *statement* ki sizere ki okenn, devret annan okenn amannman dan Konstitisyon.

Sel keksoz ki mon ti pe dir, se dan lafason travay i ganny fer dan Gouvernman Lokal. En *DA* i devret azir dan en fason enparsyal. E dan tou sa ki i fer i pa devret annan okenn persepsyon o tour li, konmkwa i en dimoun enparsyal.

Mon krwar sa i aplik dan Gouvernman osi ozordi. Sa i aplik dan Lasanble Nasyonal, kot plizyer pozisyon,

administrativ, Clerk, Deputy Clerk, son bann dimoun ki travay.

Zot bezwen demontre en kalite enparsyal. Sa i enportan. E i annan serten *behavior* ki asosye avek. E alor zisteman pou *DA* osi parey, personn pa pe met an kestyon son drwa konstitisyonnèl.

Napa lentansyon pou annan okenn lamannman konstitisyonnèl. Akoz sa nou pe senpleman dir tir politik dan Gouvernman, tir politik dan travay e annou met pep Seselwa premye. Mersi Mr Speaker.

MR SPEAKER

Mersi *VP*. Onorab Audrey Vidot.

MR SPEAKER

Onorab Audrey Vidot.

HON AUDREY VIDOT

Mersi Mr Speaker. Mr Speaker mon kestyon pour Vis Prezidan.

Prezidan in dir ki en bon sitwayen pa sipoze enport drog, vann drog e detri lazènes. Sa i son pwen ki'n fer sorti dan son *speech* yer. Me Prezidan pa'n donn bann mezir ki son ladministrasyon pe al pran pou adres sa size drog ki ankor pe afekte nou bann zenes. Alors oli son senserite lo sa size pou

adres sityasyon drog ki'n koz lo la ler i ti dan Lasanble e osi byen avan ki i ganny elekte?

E mon lot kestyon, eski ou pa'n kontredir desizyon Prezidan Larepublik letan ou pe demann nou bann Manm Lasanble, bann politisyen pou donn propozisyon ki mannyer pou apwent *DA*, kan dan diskour in fer resorti ki *DA* pou bezwen pas dan prosedir laplikasyon, prosesis *interview*?

E dernyerman dan ou repons kestyon ki'n ou'n reponn Onorab Woodcock avek Onorab Lemiel, konsernan pos *DA* e sa size montre apartenans politik, eski ou pe dir nou Lasanble Nasyonal baze lo ou bann pwen ki ou'n fer sorti dan ou repons, ki pou napa okenn kandida ki'n debout dan dernyen eleksyon, dan nenport ki distrik e ki'n perdi, pou li vwar li pe al ranplas de okenn pozisyon *DA* ki ozordi i *vacant*? Mersi.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Mr Speaker. Mr Speaker lo size premye kestyon lo size drog. Parey ou konnen Gouvernman e Prezidan Ramkalawan in fer son

pozisyon lo drog tre kler. E sa se nou bezwen elimin sa fleo dan Sesel e sa i pou vin atraver plizyer zefor, ki i pou bezwen ganny fer dan pei pou elimin sa fleo.

Dan son *statement* i pa'n elabor lo tou sa bann keksoz, parey i pa'n elabor lo plizyer lezot plan Gouvernman, parske nou annan kontrent letan.

E ozordi mon pa pou vin donn okenn detay spesifik lo sa lalit kont drog parske mon pa krwar i apropiye ozordi pou fer sa. Kan i annan bann dimoun e bann Minister ki konsernen ki pou direktman lye avek sa ki pou kapab vin donn sa bann leksplikasyon.

E mon asire napa nanryen pou kasyet ladan ler apropiye a en moman apropiye kan nou vin swa donn en *statement*, swa reponn kestyon spesifik lo la sa bann lenformasyon i ava vini.

An term kontradiksyon dan sa ki mwan mon'n dir e sa ki Prezidan in dir. Non. Mon pa santi i annan en kontradiksyon. Prezidan in dir poudir i devret annan en prosesis pour apwent *DA*. E se atraver *interview*.

Mwan sa ki mon'n dir, si Manm Lasanble i santi zot anvi kontribye. E zisteman Gouvernman, Prezidan Ramkalawan sa Gouvernman ki la i anvi konsilte e Lasanble

Nasyonal i en Lenstitisyon enportan ki nou koz avek.

Si zot annan lide petet lo sa *statement* lo lafason ki nou apwent *DA* ki zot krwar i pou pli i pou fer lazistis pou Lepep Seselwa, nou pe envit zot pou ofer zot kontribisyon. Selman Prezidan li in met en fason ki li i krwar i devret al devan e mon pa pe kontredir sa ki li i pe dir.

E an term bann dimoun ki'n deza debout e ki anvi antre dan en pozisyon administrativ oubyen dan *post DA*, mon pa krwar i annan okenn Lalwa ki anpes en dimoun fer sa. Me sa ki enportan. Sa ki enportan se zot bezwen zwenn bann kriter ki ganny mete pou zot antre dan sa *post*.

E enn fwa zot antre dan sa post zot bezwen fer sir sa ki pep Seselwa in vwar dan lepase pe arive, kot i annan ti annan sa zafer' ek nou pa ek nou.' Oubyen mwan mon'n konn serten lenstans kot *DA* i dir ek sa dimoun, "Ou'n vin rod en lasistans? Be al rod kot ou *MNA* pa ou ti elekte li, al rod kot li!"

E se sa bann kalite *statement* ki pa devret arive en *DA* i devret enparsyal, devret dir wi ou'n vin rod en servis pou gouvnmantal, mon pa enterese ki bor ou sorti mon pou donn ou sa servis.

Se sa ki nou anvi war, Sesel i pou tou son zanfan tou dimoun ki *apply* pou sa *job* i devret gannyen e si i *meet* son kriter. Mersi Mr Speaker.

(APPLAUSE)

MR SPEAKER

Mersi *VP*. Onorab Clive Roucou.

HON CLIVE ROUCOU

Mersi Mr Speaker. Bonzour tou koleg Onorab. Mr Speaker mon annan de kestyon pou *VP*.

Premye kestyon an relasyon avek 3 Lanbasad ki'n ganny frenmen e larepons ki *VP* in donn nou, mon demann *VP* si i annan okenn evalyasyon ki pou ganny fer lo lezot Lanbasad. Prenon kont zot fonksyonman dan zot pei respektif ki zot pe fer?

Epi mon dezyenm kestyon lo prononsman Prezidan yer lo vaksen *COVID-19*, si Gouvnmant in komans fer okenn evalyasyon e kou lo fasilite stokaz pou asir sa ki nou apel, *potency* bann vaksen prenon kont zot tanperatir ki zot devret ganny stoke? Mersi.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Mr Speaker. Mersi Onorab. Onorab sa legzersis pou revwar kou loperasyon Minister Zafer Etranzer atraver bann Lanbasad i en legzersis kontinyel. E sa sete en legzersis ki'n trouv poudir toudswit sa 3 i devret ale parske la nou dan en moman difisil e nou devret fer li.

Mon pa vwar aköz sa legzersis pa devret reste toultan azour, kot nou pe kontinyelman regard nou bann kou partou. E si zanmen zot trouv nesese pou pran lezot mezir, sa i ava ganny fer.

An sa ki konsern bann kou asosye avek vaksen, wi, diskisyon in konmanse avek *Health Care Agency*. Annefe Prezidan dan son vizit kot *Health Care Agency* semenn pase oubyen de semenn pase, i ti koz avek zot bann lozistik zisteman ki kapab arive a lavenir, si nou annan sa vaksen ki pe vin Sesel.

E ki manner nou pou kapab tenir sa bann vaksen nou tou nou konnen poudir zot bezwen ganny garde dan serten kondisyon e tanperatir ki ba. E bann kondisyon ki *strict* e alor Gouvernman i deza an diskisyon ek *Health Care* pou fer sir sa bann lozistik i an plas

pou ki ler vaksen i arive tou pep Seselwa i ava ganny son bann son pikir e son doz ki nesese, pou ki nou vremen protez nou lekor kont sa fleo. Mersi.

MR SPEAKER

Mersi. Onorab Phillip Arissol.

HON PHILLIP ARISSOL

Mersi Mr Speaker. Mon kestyon i lo *COVID* menm, vi ki ka *COVID* i ankor reste alarman mondyalman, e nou bezwen paran bokou prekasyon.

Eski *VP* i kapab dir Lasanble si tou Lenstitisyon Skoler Mahé, Praslin, La Digue e Silhouette i annan en *sickbay* byen ekipe pou nou bann zanfan resevwar premye swen. E osi si nesese i arive ki zot ganny izole, ziska ki paran i arive eski nou annan? Mersi.

THE VICE-PRESIDENT MR AHMED AFIF

Mersi Onorab Arissol. Mon napa lenformasyon detaye mon ava rod avek Minister Lasante. Selman sa ki mon'n konpran atraver *PS Finans* se ki zot in fer provizyon pou ki dan diferan rezyon si i annan en ka ki arive oubyen en lenfeksyon ki arive, ki zot kapab pran aksyon nesese sirtou dan bann groupman parey lekol.

So, sa i deza an plas, me mwan mon napa sa detay me mon kapab rode pou fer ou gannyen. Mersi Onorab.

MR SPEAKER

Mersi Onorab Chantal Ghislain.

HON CHANTAL GHISLAIN

Mersi Mr Speaker. Bonzour tou dimoun. Mr Speaker Prezidan in anonse ki sa ki annan son *forex* zot kapab fer vini loto. Minis Hassan, ki lasirans ki ou Gouvernman i donn sa pep ki zot pa pe reouver laport pou *black market* rantre?

Eski la prezan, sa dimoun ki pe fer vini loto pou bezwen devwale kote, e ki fason in ganny son *forex*? Eski ou pe dir piblik Seselwa ki en dimoun ki annan son kantite Roupri ozordi, i kapab al kot sa enn ki pe fer vini loto ki annan Dolar or *forex*, e *bargain* avek kanmarad lo *rate exchange*?

Mon lot kestyon, eski Minis ou kapab dir avek sa Lasanble, ki plan Gouvernman lo lafason pou retir likidite dan sistenm? E konbyen ou Gouvernman pe prevwar Dolar i ekspekte arive, an relasyon avek Roupri ziska ki sa to lesanz i stabilize? Mersi Mr Speaker.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Mon'n sey *note* tou kestyon ki ou'n demande. Si mon mank enn ou a *remind* mwan.

Lo kote ki mezir pou sa, ki ou kapab aste ou loto si ou annan ou *forex*? Sa pou mwan i senp, i en mezir tanporer. *Ok*? I pa en mezir permanan, i en mezir tanporer *as* nou retourn *back to* en normalite dan nou lekonomi. E mezir i pou bezwen senp. Se ki sa dimoun ki pe enport loto i bezwen montre ki son larzan ti dan en *bank account*.

E sa i pa vedir ki i annan kontrol sa, i zis ler ou vini ou fer ou laplikasyon pou en *import permit*. Dan ou *bank account* ti annan *available at the time* sa Dolar, so i pou bann dimoun ki deza annan en *foreign exchange account*.

So, lo kote likidite i responsab, lenstitisyon Sesel ki responsab pou *manage liquidity* dan *financial system*, se Labank Santral. So Labank Santral i annan bann lenstriman ki *manage liquidity* avek. So i fer bann *auction* kot i *mop liquidity* dan sistenm. Be, sanmenm sa ki mon ti eksplike taler, se ki ler Labank Santral i fer son louvraz ki i pe tir likidite dan sistenm.

Me lo kote fiskal napa plis likidite ki pe ganny azoute dan sistenm. Ki fer zefor Labank Santral vin en pe pli difisil.

Lo kote *rate* Dólar, mon ti mansyonnen semenn pase ki tou sa bann mezir ki pe ganny pran pou lemoman, se pou stabiliz *exchange rate*. *Ok?* So ou pe kontrol kantite likidite ki i annan dan sistenm. Ou pe redwir demann *forex*.

So, *rate* Dolar *at the end of the day*, i baze lo *demand and supply*. So Labank Santral lo son kote i pe pas mesaz tou le semenn. Kot i pe dir redwir demann. So ler ou redwir demann ou redwir *consumption*. Ler ou redwir *consumption*, ou pe redwir demann pou Dolar. E la i ava annan bann mezir fiskal osi ki redwir kantite likidite dan sistenm.

So sa ki pou determin ... Nou dan en marse lib ler i konsern pri Dolar. So i pou ganny determinen par *demand and supply*. E nou bezwen met bann mezir ki lenfliyans demann, me osi ki kontrol lo *supply* likidite *in the system*.

Mon krwar mon'n reponn. Ti annan en lot? *Ok*.

HON CHANTAL GHISLAIN

Mr Speaker i pa'n reponn sa bout kot mon'n demande, eski i pe dir piblik Seselwa ki sa

dimoun ozordi ki annan son kantite Roupi, i kapab al kot sa enn ki annan Dolar, *and bargain* avek kanmarad lo *rate exchange*? Lo *rate exchange*.

E apre i pa'n vreman reponn lo, ki zot pe prevwar kantite, ki oter Dolar i kapab arive an relasyon avek Roupi? Eski zot annan en nide antet apepre ki zistans i pou arive, ziskan ki i kapab stabilize? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab. Mon krwar lo sa dernyen kestyon mon'n reponn. I pa fasil pou dir ki bor Dolar pou ale. E mon'n eksplike poudir se ki aktivite ki dimoun i fer ki determin ki arive ek Dolar. So si nou redwir *consumption* e nou kontrol likidite dan sistenm, *rate* Dolar a stabilize. Me si nou kontinyen *consume*, e nou pa kontrol likidite dan sistenm. Depresyasyon pou kontinyen.

So i pa posib pou mwan dir ki bor i pou ale. Mon kapab dir ou bann fakter ki pou enfliyans *rate* Dolar.

Lo kestyon *regarding*, si i kapab? Mon krwar ou ti pe *relate to black market*. Dan en

sistenm liberalize kot *demand and supply* ki determin pri. E sanmenm sa ki ler mon ti ganny demande sa kestyon o paravan, si mon ti krwar dan en sistenm *peg*? Ki mon ti dir 'non'.

Akoz en sistenm *peg* ki anmenn en *black market*. Akoz ou *rate* Dolar i pa reflekte realite ozordi. Me dan sistenm kot *demand and supply* pe determin pri, i senp. Ou pa kapab annan en *black market*. Akoz ou *equilibrium between demand and supply* pe ganny *meet*. E sistenm banker i sipoze delivre lo la. So ou pa kapab annan en *black market*. Mersi.

MR SPEAKER

Mersi Minis. Onorab Norbert Loizeau.

HON NORBERT LOIZEAU

Mersi Mr Speaker. Mr Speaker, mon anvi demann Vis-Prezidan, vi ki Prezidan, mon Prezidan Wavel Ramkalawan yer ti dir ki, pou fer sir ki tou Seselwa i antre dan lanplwa. Akoz se atraver nou larzan i kit pei atraver bann etranze ki dan lanplwa isi, ki nou larzan i ale.

Eski mon anvi demann Vis-Prezidan, si pou annan ankor *GOP* ki pou ganny donnen? An se moman mon war i annan serten ki'n antre. Parey kot *Shell* mon war en

Endyen. Petet in ganny son *GOP* depi letan, en pe letan avan Gouvernman sortan in donn li.

Apré mon dezyenm kestyon Mr Speaker. Mon anvi demann ek Vis-Prezidan or Minis, vi nou Prezidan in dir ki pou ede redwir en pe kou lavi. I pou met *photovoltaic* kot *STC*, pou ki sa reveni ki nou a gannyen, i ava pas lo konsonmater.

Mon anvi osi demann ek Vis-Prezidan or Minis, si zot annan en lentansyon osi vi ki toultan nou'n koz lo *middleman*, ki zanmen in ganny *get rid* avek par Gouvernman sortan. Eski zot, zot annan en plan pou *get rid of* bann *middleman*, pou ki nou ava ganny nou komodite en pe direk, pou ki sa benefis i ava pas lo konsonmater? Mersi.

MR SPEAKER

Mersi Onorab. Minis. Eskiz mwan mon krwar premye kestyon in adrese pou Vis-Prezidan korek? Nenport ale. Minis.

THE VICE-PRESIDENT MR AHMED AFIF

Mersi Mr Speaker. Mr Speaker mon a komans lo sa enn dezyenm, kot ou ti pe adres *STC* e kou lavi. Parey ou konnen sa

mezir ki Prezidan in anonse, toudswit lo kou loperasyon STC i pou tir R20 milyon. Ki en sonm sibstansyel, e lentansyon sete ki pou demann STC pou fer sa benefis ganny donner avek konsonmater. E sa i ava ede pou fer pri lavi desann.

Me lo kote lenportasyon e lafason ki sa bann lenportasyon i a osi kapab bese. Se lentansyon Gouvernman parey in dir pou fer sir ki pri ki marsandiz i ariv Sesel, i en pri ki abordab. I en pri ki donn valer pou larzan. E pou ou ganny pli bon valer pou ou larzan, se kot ou al pli pre avek en sistenm distribisyon, ki asire ki borde sa bann marsandiz i sorti kot fournisseur. Atraver son distribisyon pou li vin isi, ou pe rod sa kou minim.

Alor dan lemonn komers ozordi, i annan fason. E se la kot STC e tou marsan Sesel, i devret fer sa zefor ki zot ariv pri pli pre ki komers i permet zot arrive. Kot kriter pli enportan se pri ki sa komodite pou ariv isi. E ki pou finalman desid lo pri dan laboutik.

Alors se sa ki nou pou ankouraz STC koman en fournisseur enportan dan Sesel. E en enportater enportan, pou li fer sir ki i ariv pli pre avek fournisseur. Atraver sistenm distribisyon pli efikas, e pa

atraver zis serten dimoun ki pe fourni a en nenport ki pri. Ki finalman, wi marsandiz i ariv Sesel. Me an term valer pou larzan, e nivo konpetitiv Seselwa ki pe perdi.

Nou, nou bezwen fer sir nou fer le kontrer. Kot tou marsandiz ki ariv Sesel i meyer pri ki Seselwa i kapab gannyen pou son larzan. E sirtou avek en Dolar ki pe depresye. Sa zefor i bezwen vin pli enportan ankor.

Lo kote premye kestyon Onorab, zis *remind* mwan. Mon pa ti'n fer en *note* sa.

HON NORBERT LOIZEAU

Vi ki Prezidan in dir ki i pou fer sir pou ankouraz tou Seselwa pou antre dan lanplwa? Akoz bokou nou larzan ki sorti se travay bann etranze ki travay isi larzan i kite. I konsern *GOP*.

THE VICE-PRESIDENT MR AHMED AFIF

Mersi Onorab. Konsernan *GOP* lentansyon Gouvernman primordyal se fer sir ki tou Seselwa ki annan en loportinite travay ozordi, i ganny sa loportinite travay. Me nou konnen poudir i annan serten travay ki ozordi i annan dan pei. Me ki malgre ki i annan Seselwa ki pa pe travay i pa neserman annan sa skil pou li ariv laba.

Alor sa legzersis pou konnen si nou pou donn *GOP* ou non, i bezwen baze lo sa *assessment* ki *SETS* pe fer ansanm avek Gouvernman ek Minister lanplwa. I en legzersis ki pe kontinyen la e i entans kot nou pou regarde e byento posibleman boner an 2021 bann mezir kot i konsern *GOP* i ava ganny anonse.

Me sa ki mon kapab dir ou ozordi se ki, nou bezwen fer sir ki tou dimoun ki pa dan en lanplwa. E i kot en lanplwa i aparet, e li i annan sa *skill* pou al ladan nou pa kapab les en etranze vin bous sa trou, si mon kapab servi sa term.

Nou bezwen donn sa loportinite Seselwa, e se sa ki Gouvernman pou fer sir atraver son program an 2021, ki sa i arive, e sa i ganny anonse dan en fason kler, kot tou anplwayer i a konnen sekter prive e Gouvernman i ava azir dan en fason ki normal, ki fer sir ki tou dimoun i ganny en travay. Mersi.

MR SPEAKER

Mersi. Onorab Sathya Naidu.

HON SATHYA NAIDU

Bonzour Mr Speaker. Bonzour tou bann koleg Onorab, bonzour Minis, bonzour *VP*.

Nou'n ganny dir ki *COVID* in anmenn en lenpak negativ, non, selman lo nou lasante, me osi lo nou lekonomi. Me 2 aktivite ki nou pa'n zanmen eksplwate dan lepase se lagrikiltir ek lapes. Mon konnen ki i fer selman 24 zour, me kwa ki pou bann premye pa annavans ki zot pou pran pou relans lagrikiltir e pous Sekter Lapes annavans?

Mon dezyenm kestyon se pandan Manda Mr Faure koman Prezidan, in annan tou sort kalite regilasyon ki ti'n ganny met an plas. Me ziska prezan napa okenn aksyon ki'n ganny pran ek bann ki kas sa bann regilasyon. Yer Prezidan Ramkalawan ti'n fer en lanons ki bann lorganizasyon ki pa pran bann mezir *COVID* serye, tel ki bann *business operators* pou fer avek sispansyon zot *license*. Alors ki mannyer eski zot anvizaze met sa an aplikasyon dan en fason efikas?

Mon trwazyenm kestyon se ankor enn fwa pandan Ladministrasyon Prezidan Faure in annan tou sort kalite *Board* ki'n ganny apwente. Annefe mon'n perdi kont.

Alors, eski ladministrasyon Prezidan Ramkalawan pou fer en revi total lo bezwen, e nesesite sa

bann *Board*? Mon katriyenm kestyon se, Prezidan

MR SPEAKER

Eskiz mwan Onorab. 3 i ase pou le moman, permet mwan. *VP* ou kapab adres son bann kestyon.

THE VICE-PRESIDENT MR AHMED AFIF

Mersi Mr Speaker. Mersi Onorab. Onorab san ki mon reponn dan plas Minis Lagrikiltir ek Minis Lapes lo bann mezir spesifik. I sifi pou mon dir ou ki sa 2 sekter i 2 sekter ki Gouvernman i konsider koman tre, trez enportan dan en fason petet pli enportan, se kot zot kapab zwe en rol enportan pou anmenn plis deviz dan pei.

Sa sirtou lo kote lapes, me lo kote lagrikiltir kot i kapab sov nou depans deviz pou sa pei ki parey ou konnen deviz li menm i pou ede si nou pe gard plis isi pou nou tenir son tarif rezonnab.

Alor dan lapes sa ki mon konnen Gouvernman pe deza an kolaborasyon avek sekter prive ek nou bann partener enternasyonal. Nou pe koz lo lafason pou nou kapab ganny plis avek menm aktivite ki egziste ozordi.

E parey Gouvernman in deza dir. Sa Lakor Lapes ki nou

annan nou bezwen rod fason pou rod bann term ki pli preferab pou Sesel. E kot Sesel pou benefisye plis.

E an menm tan sa i lo kote (lapes endistriyel) lo kote lapes artizanal. Nou bezwen fer sir ki peser ozordi i ganny tou bann debousman nesaser, pou li kapab fer son louvraz parey i devret. Alor kot i annan posibilite pou Gouvernman toudswit antre dan bann fasilite ki dan por, ki dan distrik. Nou bezwen fer sir ki sa bann fasilite i a zour, *ice plant* pe marse, labwet i annan, landrwa pou mouy bato i konvenab.

E la mon mazin Onorab Arissol ki pe rod en bwe dan zis kot son lapas laba Anse Boileau. Sa bann pti keksoz koumsa.

Mon pa dir ptipti dan lesans ki pa enportan, se bann keksoz ki enportan. Me ki nou devret kapab met lanmen lo la e rezourd vit. E dan Bidze 2021 sa se en keksoz ki nou pou met lanfaz lo la. Lo kote lagrikiltir vitman nou pou fer sir ki tou ferme e bann problem nou'n koz en kantite lo bann problem ki bann ferme, i annan. Nou bezwen fer sir ki atraver Bidze 2021 sa bann kontrent pe ganny adrese.

E bann kontrent se akse avek bann resours, akse pou

zot kapab met anmars zot bann landrwa pou zot travay. E fason pou ogmant prodiksyon, bann fason vit pou ogmant prodiksyon. E sa i vin sirtou atraver lasistans teknik ki fermye i gannye pou zot kapab fer zot bann lagrikiltir mars pli byen.

Lo kote *COVID* e bann mezir ki an plas, ankor Minister Lasante i pe travay an etrwat kolaborasyon avek Minister Tourizm, pou fer sir ki bann mezir ki zot in rekomande i ganny met an plas, pou fer sir ki risk i vin minim pou popilasyon.

I touzour en defi sa. I touzour en defi e menm lo kote Minister Finans mon kapab dir ek ou nou osi Gouvernman *even* biro Vis-Prezidan. Nou pe kontinyelman koz avek zot pou trouv sa balans. Lo en kote ou bezwen gard nou popilasyon sen e sof, me de lot kote ou bezwen les biznes marse. E les touris antre pou vin depanse isi Sesel. Me ou bezwen ganny sa balans. Be si ou ganny sa balans mal lo en kote ou kapab pa ganny touris ditou. Dimoun pa pou mor ek *COVID*, oubyen pa pou malad akoz *COVID*. Me i riske malad oubyen menm si i grav menm, ou kapab trouv en lanmor akoz i pa pe ganny sa

lasistans nesese, e resours nesese pou kapab sonny ou.

So nou bezwen balans li, me nou pe travay etrwatman avek tou bann lotorite. Sa katriyenm kestyon lo *Board* mon a permet Minis reponn. Mersi Mr Speaker.

MR SPEAKER

Mersi. Minis.

MINISTER NAADIR HASSAN

Mersi Mr Speaker. Mersi Onorab. Wi mon lobzervasyon se ki a se moman i senpleman annan tro bokou striktir dan Gouvernman. E ler nou annan tro bokou striktir, ou annan tro bokou *Board*, ou annan tro bokou Komite. E sa i vin a en kou, e osi i azout birokrasi dan louveraz Gouvernman.

Ki nou pe fer, i annan en *High Level Public Sector Reform Forum* ki'n ganny *setup*, ki pe regard sa *issue*. E i pe fer rekomandasyon ki mannyer nou *streamline* sa bann striktir dan Gouvernman. E nou fer li pli efektiv nou redwir demokrasi e kou ki asosye avek en striktir ki ase kompleks. So sa louveraz pe arive e ler i finalize i ava annan bann lanons. Mersi.

MR SPEAKER

Mersi Minis. Onorab Egbert Aglae.

HON EGBERT AGLAE

Mersi Mr Speaker. Bonn apre midi Minis, VP, PS. Premye kestyon pou VP. VP eski ou kapab donn Komitman sa pep e Lasanble Nasyonal, an vi ki nou annan en sityasyon deviz, en kriz ki ou Gouvernman pou reste angaze kot i konsern sa size \$50milyon pou Lepep Seselwa konnen ki'n arive, e ki sa larzan i a kapab tourn dan kof Leta? Mersi.

Dezyenmman, lo kote 13enm mwan saler VP mon ti a kontan ki ou Gouvernman i pran en pe refleksyon ki i en desizyon ki zot in pran. Me selman i nesesit en refleksyon, akoz i annan en kous ki ler pou ganny peye boner Desanm, sirtou bann ki lapey i ba, ler pou ariv ver le 10 Zanvyè i pou napa en saler, i pou napa en mwayen dan son lanmen.

En sizesyon sete Gouvernman sey eksplòre ki pa pou kout zot larzan ki apartir ver le 10 le 15 Zanvyè *at least* en 25poursan zot saler ki zot pou ganny Zanvyè i kapab ganny donner, ki zot kapab petet ariv zot *settlement* ziska ver le 30 Zanvyè.

Trwazyenmman, vi ki ou Gouvernman pe, Gouvernman

dizour mon kapab dir pe met lanfaz lo plis latransparans ek responsabilite. Eski ou ti kapab koman VP donn en pledwari ki okenn nouvo Minis ouswa nouvo lapwentman kot i konsern transpor. Napa nouvo transpor ki ganny donner ziska ler sityasyon ekonomik pei i ganny amelyore? Servi sa ki i deza annan la. *Ok, e ...*

MR SPEAKER

Mersi Onorab. 3 kestyon i a sifi silvouple, permet mwan. Minis.

MINISTER NAADIR HASSAN

Mersi Mr Speaker. Mr Speaker premyerman lo sa Komitman Gouvernman pou fer sir ki i trouv larzan pep Seselwa. Tou larzan ki'n perdi pou pep Seselwa ki enkli sa \$50milyon, mon donn ou en Komitman Onorab ki Gouvernman pou fer tou sa ki i annan dan son resours, dan son kapasite ki nou trouv larepons.

Me non selman larepons, nou bezwen fer sir ki sa ki responsab pou sa i rann kont, e tou Lenstitisyon Gouvernman ki la, tou lenstitisyon Leta ki la pou fer sir ki sa i arive.

Gouvernman pou koz ek zot, pou fer sir ki napa okenn zefor ki ganny met de kote pour ki nou trouv sa larzan. E sa ki koupab, sa ki responsab i

bezwen rann kont avek lazistis e pep Seselwa. Sa mon donn ou mon langazman pou Gouvernman Sesel.

(APPLAUSE)

THE VICE-PRESIDENT MR AHMED AFIF

Dezyenmman, lo 13enm mwan. Sa refleksyon ki ou'n pase mon mazine i en keksoz ki i pa pou afekte Bidze parske i zis en larzan ki pey en pti pe pli boner. Me menm problem pou arive an Fevriye, me problem si prezan ou pey Fevriye boner ou pou arive. So, i pa neserman pou rezourd sa problem. Me si i annan fason ki nou kapab *manage sa cashflow* pou sa dimoun dan en sans si i posib.

Nou ava regard bann posibilite, selman mwan, mon pa krwar i pou neserman rezourd tou problem ki annan.

Lo kote transpor, sa ki mon kapab dir ek ou se ki Gouvernman i bezwen asire ki son administrasyon i fonksyonnen. E mon pa oule dir ou poudir i pa pou aste okenn nouvo transpor, parske si i annan en transpor ki pa bon i met, i kapab met lavi amenn danze, ou bezwen ranplas li.

E ou kapab dir be *ok* be mon a *write-off* li mon pa pou ranplas li, oubyen mon bezwen

ranplas ki parske mon bezwen mon loperasyon marse. Sa i pou baze lo bann diferan ka.

Selman lasirans ki mon donn ou se Gouvernman pa pou depans larzan dan en fason ki pa pridan. I bezwen depans larzan tout an konesans ki ozordi nou pe prete tou sa ki nou depanse.

E ler nou fer sa nou bezwen fer sire nou ekonomik avek nou desizyon. E nou pran nou desizyon parey en biznes ti pou mazine e ou fer li dan en fason ki prezerv larzan pep Seselwa, e nou fer zis sa ki neser ozordi. Mersi Mr Speaker.

MR SPEAKER

Mersi. Onorab Michel Roucou.

HON MICHEL ROUCOU

Mersi Mr Speaker. Bonzour a tous. Bonzour Minis, VP. Mr Speaker eski VP i kapab dir avek nou, pourvi ki Prezidan anonse ki pou annan bann pwa lour ki pou ganny tire lo *Hypermarket STC*, ki komodite i ava desann en pe plis. Kan ki Seselwa pou war sa redwir lo komodite? E osi eski i annan bann negosyasyon ki'n ganny fer avek (*SCCI*) an term ki zot ti pe anmas sa *rent* avek *Hypermarket*? Mersi. Sorry SSI.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. An se moman mwan an diskisyon avek *Board STC* e sa bann mezir ki'n ganny anonse i ase nouvo e *STC Board* ek son *management* i bezwen *go back* fer bann evalyasyon.

E mwan mon diskisyon ek zot pou regarde ki mannyer, a ki pwen ki zot pou santi sa rediksyon e zot pou dan sa pozisyon finansyer pou regard bann kou bann komodite esansyel. Savedir koman sa evalyasyon ava fini zot ava konnen. Mr Speaker i annan en dezyenm kestyon an term *SSI*, Eski i annan bann negosyasyon pour vi ki zot pa pou anmas sa *rent* la?

MINISTER NAADIR HASSAN

Ler ou pe dir negosyasyon egzaktaman ...

HON MICHEL ROUCOU

Pour vi ki zot pa pou anmas sa *rent anymore* avek *STC*. Ki mannyer zot pou zer en finansman aprezan. Eski Gouvernman pou donn zot en finansman?

MINISTER NAADIR HASSAN

Ok mersi. Wi, Gouvernman pe *consider* sa *issue*. E diskisyon avek *SSI* pou *ongoing* la. So-

MR SPEAKER

Mersi. Onorab Andy labonte.

HON ANDY LABONTE

Mersi Mr Speaker. Bonn apre midi *VP* ek son lekip. Bonn apre midi tou Manm koleg Onorab.

Mr Speaker eski Minis i kapab swa eksplik oubyen dir avek sa Lasanble, ki ler ki nouvo transpor pe ganny enporte avek sa dimoun ki annan son prop *forex*, ki Gouvernman li menm li i pou kontinyen anmas *tax*. E petet ki lenpak i kapab annan lo kote menm enternasyonal ki kapab afekte nou? Ki si nou war ki annan en blokaz dan lenportasyon transpor an zeneral.

E mon dezyenm pwen i al lo menm size konsernan *forex*. Eski ler en biznesmenn dan English River ki'n sakrifye e anmas son *forex* letan ki Gouvernman *SPUP/ SPPF/ Parti Lepep/ US* in les \$50milyon perdi. E in disparet e li pou li pandan sa bann letan in fer sakrifis li.

Prezan in ranmas son *forex* e in deside pou li depans son *forex* dan son fason ki li i santi i apropiye. Eski i pe

ganny negligize *or* i pe ganny anpese pou li depans sa larzan, eski son drwa pa pe ganny vyole anba nou Konstitisyon?

Dezyenmman *anyway* sa de kestyon i ansanm. Eski ler ki Gouvernman sortan ti anmenn Bidze Siplemanter pou *FA4GR* *yes*, eski i ti enkli ladan 13enm mwan saler? E si in enkli eski sa larzan i ankor la *or* dan negligans ki sa larzan i fini?

MR SPEAKER

Mersi Onorab sa i fer 3. I fer 3 kestyon.

HON ANDY LABONTE

E mon ti annan ankor en lot pti leklersisman. Ale mersi.

MR SPEAKER

Nou ava les Minis adres sa bann mersi. Minis.

MINISTER NAADIR HASSAN

Mersi Mr Speaker. Mersi Onorab. Lo ou premye kestyon *regarding* lenportasyon transpor. Parey zot pou konnen ki lenportasyon veikil i *one of the main contributors of tax* pou Gouvernman, *so* definitivman Gouvernman in perdi en kantite larzan sa lannen aköz sa *ban* lo enportasyon veikil.

E avek sa bann nouvo mezir, i ava ouver en pti morso ki Gouvernman i kapab anmas

en pe larzan pou finans Bidze. Me i osi enportan pou konpran poudir sa *issue of* restriksyon *trade* ki i annan lenpak lo *various levels* en?

Parey zot konnen poudir Sesel i form par menm *WTO*, e zeneralman bann restriksyon *trade* i pa ganny ankouraze. E osi i annan bann *rules IMF* lo kote bann *current account restrictions*, ki ou pa kapab pran bann mezir ki *restrict flow of services and goods*. *So* sa bann mezir si i ganny pran i ganny pran dan bann sityasyon ekstrenm, e i sipoze kour term.

E kour term normalman ou pe regard ou en dele letan mwens ki 12 mwan. E dan sa ka ki nou lo la par egzanp lo kote *ban* lo lenportasyon veikil i deza apepre 9 a10 mwan, ki sa *ban* i la.

So, wi i annan bann konsiderasyon enternasyonal ki enpakte lo sa bann mezir ki ou kapab pran. Me osi i annan bann konsiderasyon ki par egzanp i annan bann *dealership* ki annan zot bann Kontra e zot bann Lagreman ek zot *supplier*, ki si ou annan en *ban* ki al plizyer en letan ase *extended*, i annan en lenpak lo kontra ki sa bann *dealership* i kapab. E i posib ki *dealership* i fermen, i posib ki sa *whole supply chain* i ganny afekte e si ou pe pran

bann mezir ki pe tro lonterm. So wi pou reponn ou kestyon i annan bann *unintended consequences of trade restrictions*.

Lo ou dezyenm kestyon *regarding the right to spend foreign exchange*. Wi, mon krwar nou napa kontrol *foreign exchange* dan pei pou le moman, so en endividi i *free* pou li *spend* son *foreign exchange*.

Lo kote *FA4GR PS* in konfirman ek mwan ki 13enm mwan saler pa ti dan Bidze 2021. I pa ti *include* en 13enm mwan saler dan Bidze ki ti ganny soumet avek Lasanble. Mersi.

MR SPEAKER

Ok, mersi Minis. Onorab Sandy Arissol.

HON SANDY ARISSOL

Mersi Mr Speaker. Bonn apre midi a tous. Bonn apre midi tou Manm dan Lasanble Nasyonal.

Mr Speaker mon ti ava kontan demann Vis-Prezidan anvi ki i ti normal anba Gouvernman *US* pou en *DA* vin *MNA*, e pou Minis vin *MNA*. E la ozordi i pa normal pou en kandida ki'n pran par dan eleksyon kapab *apply* pou vin *DA*. E la ozordi menm parti zot apel zot lekor partireturn

ankor.com. Zot pa tro dakor ek sa.

Mon kestyon lo la se eski sa prosedir *interview* la ki mon'n tann Prezidan koz lo la yer an relasyon avek bann *DA*. Eski sa i pou aplik bann *DA* ki fek *apply* pou zot vin *DA*, oubyen i pou osi sa *interview apply* pou bann vye *DA* ki deza la, e ki krwar poudir Ladministrasyon Distrik pou zot, e napa person ki annan drwa retourn dan sa Administrasyon Distrik? Par egzantp Roche Caiman i en legzanp? Premye kestyon.

Mon dezyenm kestyon mon ti ava kontan tous lo pwen ki Prezidan ti fer resorti an relasyon avek bann etranze dan pei, pou sey gete ki mannyer nou kapab ranplas zot par bann Seselwa pou ganny plis prodiktivite pou ki *forex* pa sorti.

Mon ti ava kontan demann nou Gouvernman *du jour* eski zot okouran, eski zot pe fer lenvestigasyon, eski zot pe fer travay anvi ki Gouvernman sortan, anba Gouvernman sortan ti annan plizyer etranze ki'n antre dan pei koman touris, e apre nou aprann poudir zot pe travay e i annan bann menm ki nou aprann napa *GOP*?

Eski dan sa laliny nou pe koz etranze, eski Gouvernman pe fer lenvestigasyon, pe osi vwar kantite etranze ki nou annan dan pei ki ilegal ki napa *GOP*, e ki'n antre lo viza touris me selman zot pe travay? Parey mon aprann i annan enn de zil en pe lwen avek Mahé ki zot pe fer sa.

Mon trwazyenm kestyon e mon dernyen kestyon Mr Speaker, parey ou'n permet tou Manm, mon ti ava kontan demann Vis-Prezidan, eski letan Lanbasad *Cuba* i fermen, eski bann etidyan Seselwa ki pe lekòl *Cuba*, eski zot osi zot retourn Sesel akòz zot ti pe lekòl dan Lanbasad *Cuba*?

Oubyen zot kontinyen reste laba akòz liniversite pa dan Lanbasad *Cuba*? Mersi bokou Vis-Prezidan.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Mr Speaker. Lo kote, lo premye kestyon konsernan lekel ki kapab vin en *DA*? Ou larepons *i* tre senp Onorab. Sesel i pou tou son zanfan.

E nenport dimoun, nenport ki afilyasyon politik ki ou ti annan, si ou pe vin travay dan en fason enparsyal pou ou

deservi tou popilasyon, ou afilyasyon politik ki ou ti annan ler ou antre dan sa biro ou bezwen met li deor.

E ou deservi tou dimoun. Me selman ler ou deor ou annan panse, ou annan ou larelizyon, ou annan ou fason politik. Me selman dan sa kapasite koman en *DA* ou bezwen deservi tou dimoun se sa ki enportan.

Lo kote etidyan e Lanbasad mon krwar i kler poudir tou dimoun ki swa ou en etidyan, oubyen ou en vwayazer oubyen ou en pasyan ki pe pas dan sa landrwa ou pou ganny deservi ki annan Lanbasad ou non. Kestyon se ki fasilite ki pou an plas pou deservi ou ler ou laba.

E nou koman Gouvernman nou bezwen fer sir kot nou sitwayen i ete si i pe etidye, si i pe vwayaze nou bezwen fer sir ki an menm tan ki nou pe sov larzan dan Bidze nou bezwen fer sir ki zot ganny zot fasilite.

Etidyan *Cuba* byensir zot pou reste zot liniversite i pa dan Lanbasad. Alor zot pou kontinyen travay, zot pou kontinyen etidye e nou swet zot tou de byen. E nou espere ki zot retourn Sesel sen e sof e deservi zot pei. Mon ava les Minis Hassan reponn lo *GOP*. Mersi Mr Speaker.

MR SPEAKER

Mersi Minis.

MINISTER NAADIR HASSAN

Mersi Mr Speaker. Mersi Onorab. Wi, lo *issue GOP* i annan en legzersis ki nou pe fer ki *basically* nou pe *take stock* ki bor sa bann *GOP* i ete. E par egzanp sa semenn nou'n ganny enformen poudir *even* dan Gouvernman i annan en kantite *GOP* i ganny *issue* e mon ava donn ou en legzanp se ki *even* kot *APDAR* zot anploy drayver ki etranze.

So, nou pa war aköz ki Seselwa pa pe kapab fer sa loubraz, so dan en lanvironnman kot i annan *unemployment* e nou pe siport tou *FA4GR* dimoun. I primordyal ki nou kapab kot *as much as possible* kot i annan travayer etranze parey nou'n mansyonnen ki nou kapab met Seselwa dan sa bann lanplwa.

Lo kote sa *issue of* bann *GOP*, bann viziter ki vini ki pe travay. Mon krwar sa i annan en legzersis ki pe ganny fer e mon krwar ki Minis pou *Internal Affairs* i kapab donn en pe plis detay lo la ler sa legzersis in konplete. Mersi.

MR SPEAKER

Mersi Minis. Onorab Terence Mondon.

HON TERENCE MONDON

Mersi Mr Speaker. Bonzour tou dimoun. Dan mon 10 kestyon i reste mwan enn. Alors mon oule demann *VP* an vi ki kou lavi i reste en size enportan pou pep Seselwa. Apart ki *STC*, bann mezir ki zot pe antreprann, eski zot in regard bann lezot eleman ki pou kapab ede fer desann kou lavi dan nou pei. Par egzanp kou kominikasyon, elektrisite, eksetera. Ki bann travay zot pe fer dan sa direksyon pou fer sir ki Seselwa i kapab ganny en lavi pli meyer marse, sirtou dan sa moman difisil kot nou ete? Mersi.

MR SPEAKER

Mersi Onorab. Minis? Ale Vis-Prezidan.

THE VICE-PRESIDENT MR AHMED AFIF

Mersi Mr Speaker. Mr Speaker, kot i konsern kou lavi sa dezyenm kestyon ki ou'n poze lo ki lezot mezir nou kapab pran, par egzanp lo telekominikasyon vi ki telekominikasyon i en domenn ki tonm direkteman anba biro Vis-Prezidan, mon kapab asir ou ki nou pe deza an diskisyon avek bann operater

telekominikasyon, pou vreman konnen ki bann konstrent ki zot pe fer fas avek ozordi e pou nou rod en fason pou nou anmenn en meyer pri vizavi valer ki zot pe donner pou pep Seselwa. Se sa mon krwar ki enportan.

Ozordi telekominikasyon i en sekter vreman, i gro dan son lanpler, i enportan dan term lafason ki i pe ed sa lekonomi fonksyonnen. Tou keksoz i baze lo telekominikasyon depi dan tourizm, depi dan labank. Sekter Finansyel, dan lakour, tou sa ki nou fer ozordi i depan lo telekominikasyon.

Alor nou, nou pe annan en diskisyon serye avek sa sekter, e avek Minister li menm, pou nou trouve ki mannyer lo en premye lye nou kapab fer telekominikasyon dan Gouvernman vin pli efikas. E dezyenmman kot i konsern piblik Seselwa, ki mannyer nou kapab anmenn en servis pli abordab pou pep Seselwa.

So, sa se bann diskisyon ki nou pe antreprann. Mwan mon nouvo dan sa *post*, me selman byensir sa size i en size ki'n la pandan en pe letan. So, mon pou fer tou sa ki mon kapab pou nou kapab fer sir ki telekominikasyon i redwir.

Ou ti'n sizer en dezyenm fason o kou lavi, sou ou ti kapab zis *remind* mwan. Lo kou

lavi, ou ti'n mansyonn. *Ok.* Telekominikasyon definitivman se...

HON TERENCE MONDON

Ah wi, elektrisite.

THE VICE-PRESIDENT MR AHMED AFIF

Elektrisite. Lo kote elektrisite, nou konnen poudir Sesel nou en pei ki annan en kantite soley e ki ozordi nou pa pe servi otan sa lenerzi ki la pou nou kapab met li a laporte tou Seselwa e tou fanmir e tou biznes. E alors se nou lentansyon pou fer sir ki otan ki nou kapab nou ogmant prodiksyon elektrisite ki vin atraver fotovoltaik. E si i annan mwayen pou fer sa ariv kot ou lakour san ki ou bezwen met en gran lenvestisman, sa i pou deza ede pou bann lakour Seselwa kapab ganny elektrisite a en pri abordab.

Nou napa kontrol lo pri delwil e karbiran ki vin Sesel. Me ozordi nou konfigirasyon i tel ki nou pe depan fortman lo sa koman prodikter pli enportan pou elektrisite, se bann zenerater. Me nou bezwen trouv fason pou redwir sa, sa depandans lo karbiran. E nou, nou pou pouse ki otan ki nou kapab nou ganny lenerzi renouvlab ki sa i ava vin a lonterm en rediksyon

sibstansyel, pou tou bann fanmir e pou tou biznes. Mersi Onorab.

MR SPEAKER

Mersi. Onorab Philip Monthy.

HON PHILIP MONTHY

Mersi Mr Speaker. Bonn apre midi a tous. Mon kestyon i pou VP. VP, zis avan mon demann mon kestyon ki pou baz lo en term ki nou pa dakor aborde ziska prezan, i pou lo spor. Mon ti anvi zis fer en pti komanter swivan kestyon Onorab Arissol, lo en legzersis pou elimin, pa elimin, me redwir labi ki annan dan sistenm kot nou annan bann etranze ki pe fer bann louvraz ki bann Seselwa i kapab fer.

Donk mon sizesyon osi se ki nou regard ledikasyon en pe pros osi, akoz nou annan bann lenstans kot nou vwar en etranze pe *teach ICT*. Par egzanp 8 peryod leson par semenn, 7 peryod leson par semenn, ki nou kapab annan en Seselwa ki fer sa. E nou bezwen pey lakaz pou li, pou son fanmir e lekol pou son zanfan.

Donk, mon ti a sizere ki nou regard Sekter Ledikasyon osi ler nou pe fer sa legzersis ase pre, akoz i annan en bon pe legzanp dan ledikasyon. *Ok?*

Mon kestyon lo spor se, Prezidan in dir ki politik fodre ganny retir net dan spor *ok*, ler in fer son ladres yer. Mon kestyon, se ki bann mezir ki zot pe anvizaze antreprann ki pou ed Gouvernman realiz sa. *Ok.*

E dezyenm kestyon osi touzour lo spor. Prezidan in dir ki zesyon spor pou ganny ranforsi pou ki i annan en lapros pli profesyonnel afen ki nou bann atlet i kapab komans reve en zour, ranport en meday Olenpik.

Mon ti a osi demande donk ki bann mezir ki zot pe anvizaze antreprann pou ki, ler *COVID*, sityasyon *COVID* i *calm down*, nou ava revwar bann dimoun retourn dan stad pou get *football*, pou get *volleyball*, ki si nou gete tou dernyerman in redwir en kantite. *Ok.* Donk se sa mon kestyon. Se ki Gouvernman pe antreprann pou fer pou ki spor i relev dan sa pei, e re ganny son plas parey ti ete avan? Mersi.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Mr Speaker. Mr Speaker, sa size spor e politik, mon krwar i pou bezwen ganny trete, parey nou pe tret politik dan

Gouvernman. Gouvernman i enplike, i annan en Minister pou *Sport*. E nou bezwen fer egzakteman parey nou pe fre dan *DA*, kot politik pa antre dan ladministrasyon spor. E kote i kapab antre par egzanp, se serten spor i ganny en preferans dan en distrik, fasilite i ganny donnen akoz kekfwa swa sa *DA*, oubyen sa *MNA* i en dimoun ki zot kontan, Gouvernman i kontan.

Me mon kapab asir ou ki nou, nou pa pou regard, sa Gouvernman ki la. I pa pou regar spor koman en keksoz ki ou fer dan en distrik, kot ou annan ou en *MNA* ki'n ganny elekte, ou koman en parti politik, e ou dan Gouvernman, alors ou pou ed zis bann ki koumsa.

Nou devret retir sa, sa Gouvernman anba Prezidan Ramkalawan, son lentansyon se donn spor en *boost* parey ou dir an Angle. Savedir kot ou fodre met fasilite ki pa, i pou en kou lenfrastruktir ki enorm, ki pou met presyon lo Bidze, annou fer li. Kot dan lekol nou kapab donn plis fasilite pou bann zanfan komans ganny en lentere dan spor, e pous sa spor, nou devret kapab fer li.

Se sa bann fason e kot zanfan ki pe fer byen e ki merit ganny swa en *scholarship*,

oubyen pran par pou reprezant son pei dan bann aktivite sportive, pa bezwen deside kote i ete pou li kapab al devan.

Se sa bann fason tir politik dan spor ki mon krwar ansanm avek resours finansyel, ki pou ed nou pou pous sports pou vin lo en lot nivo, sa nivo ki Prezidan Ramkalawan in akoz lo la. Mon krwar sa i absoliman enportan.

An se ki konsern en programm spesifik pou spor, mon mazine ler Bidze i a ganny prezante, e sa bann *assessment* a ganny fer, Minis a kapab vin dan Lasanble pou donn detay spesifik, lo ki manner nou kapab promouvwar sport dan lekol e dan Sesel an zeneral.

Lo ou kote premye pwen lo bann etranze ki par egzanp pe donn *training* dan *ICT*, mon krwar si i annan dimoun Seselwa ki kapab fer sa, mon pa trouve akoz sa dimoun i annan en *GOP* pou fer sa. Zis parey taler in nonmen poudir i annan en drayver etranze ki *APDAR*, i pa fer en sans.

Mon pa konna sikonstans, me selman sa i bezwen form parti sa legzersis ki nou pe fer, ki asire ki kot i annan en *job* ki annan en Seselwa ki pa pe travay e ki kapab fer sa dyob, priyorite i devret pou li. E nou

devret fer sir ki nou Polisi i reflekte sa e ki napa *GOP* ki ganny donnen dan sa bann sirkonstans. Mersi Mr Speaker.

MR SPEAKER

Mersi Mr Vis-Prezidan. Mon rapel tou Manm ki si zot pa'n ganny leksplikasyon satisfèzan pou zot kestyon, oubyen zot annan plis kestyon ankor, zot annan touzour posibilite pou fraz zot kestyon pou *Question Time*. I reste mwan en dernyen dimoun ki ti'n lev lanmen lo sa lalis e mon pou pas li laparol e apre sa nou pou termin letan kestyon. E mon apel Onorab Georges Romain.

HON GEORGES ROMAIN

Mersi Mr Speaker. Bonn apre midi a tous. Enn bann gran prensip sa nouvo ladministrasyon se pou elimin sa sistenm 'ek nou, pa ek nou', kot nou distrik, i a travay pou deservi tou son zabitan san get kouler politik. Mon kestyon pou *VP*, eski pou annan en program ki pou ganny met an plas pou bann travayer Ladministrasyon Distrik, e osi bann departman relevan, pou donn zot formasyon lo sa nouvo fason fer? Koumsa adaptasyon i ava bokou pli vit, travay i a pli efikas e ki a lafen dizour nou ava vwar tou travayer distrik,

pe kordin servis pou byennet nou distrik. Mersi Mr Speaker.

MR SPEAKER

Mersi Onorab. Vis-Prezidan.

THE VICE-PRESIDENT MR AHMED AFIF

Mersi Onorab Romain pou sa kestyon. Wi, larepons wi. Definitivman pou bann travayer dan Ladministrasyon Distrik, i pou bezwen annan en nouvo kiltir. Parski nou konnen kot nou sorti, me nou konnen kot nou anvi ale. E pou sa kapab arive, i komans avek sa proses, i konmans avek sa ki anler e sa ki pli o dan sa biro normalman se sa *DA*. Be par lao sa *DA* i annan son Minister, son *PS* ek son Minis. Se zot ki devret donn sa legzanp. Se zot ki devret montre dan zot Minister poudir Sesel i pour tou son zanfan, e zot bezwen met sa e met lanfaz lo lefe ki nou travay pour tou dimoun. Ler a zot nivo zot pou montre sa, lo nivo *DA*, sa pou reflekte parey.

Me i pa sifi pou dir i pou ariv koumsa. Mon dakor avek ou ki i merit annan en lantrenman ki ganny fer dan sa bann biro kot nou etabli bann standar, ki zot devret adopte. Ki mannyer ou resevwar dimoun. Ki mannyer ou gard rikord lo lekel ki vin

vwar ou, ki bann problem ki zot annan. Ki mannyer sa in ganny refer. E en swivi lo la, pour ki nou konnen ki tou dimoun ki'n vini, i annan en rikord kler kot ki problem ti ete, ki swivi, ki servis ki zot in gannyen, ki lavites zot in ganny sa servis. E ou kapab konpar sa avek tou dimoun.

E dan sa fason nou ava asire ki vreman, vreman nou anmenn en transformasyon dan lafason ki *DA* i fer son louvraz, e dan lafason pep Seselwa pou ziz nou, lo sa transformasyon ki nou anvi anmennen. Mersi Onorab.

MR SPEAKER

Mersi. Mon pou remerseye Minis Vis-Prezidan e *PS Thesee* ki'n vin la pou zot partisipasyon ozordi. E ankor enn fwa, bon pa bliye poudir si zot annan ankor kestyon poz li pou *Question Time*, pou bann Minis. E nou pou fer *meeting ABC* pou prepar *Order Paper* pou semenn prosenn dan 10 minit. Alor avek sa mon pou *adjourn* ziska Mardi 9er.

Yes, Onorab.

HON SEBASTIEN PILLAY

Mersi Mr Speaker. *Sorry* mon'n koup ou *flow*. Me selman petet atraver ou mon ti a kontan demann Vis-Prezidan avek

Minis, i annan serten Lalwa ki nou sipoze resevwar devan Lasanble. I pou annan *National Assembly Members Emoluments*. I pou annan *Employment Act*, bann lamannman ki sipoze vini e i annan sa *Financial Consumer Protection Bill* ki pou bezwen vini, akoz i annan en konponan banker ki nou bezwen adrese vizavi bann zafer *loan* ki dimoun i annan ek labank, e ki mannyer labank pou konport li vizavi sa bann *loan*.

So, petet atraver ou, mon ti a kontan demann Minis pou kominik avek ou lofis, pou ki nou a kapab ganny en nide bann *Bill* ki konsern Minister Finans an relasyon ek sa bann mezir, kan ki nou pou kapab ganny li e kan ki nou pou ganny li pou kapab fer serten travay preparatif lo la. Mersi Mr Speaker.

MR SPEAKER

Mersi Onorab pou sa. Minis in note. Wi, Onorab Arissol.

HON SANDY ARISSOL

Pwen klarifikasyon silvouple. An vi ki bomaten Onorab Pillay koman *Leader* Lopozisyon ti ganny sa privez pou li fer en pti *statement* an relasyon avek Prezidan lo sa komanter, nou pa ti tonm dakor poudir Onorab

Georges osi lo nou kote ti pou ganny sans dir 2 laliny li osi an relasyon avek sa? Mon pa konnen kekfwa si in annan en konfizyon, oubyen kekfwa si napa. Zis en pti klarifikasyon. Mersi.

MR SPEAKER

Onorab ou a rapel ki nou ti diskite sa dan *ABC* ase lontan, e serten propozisyon ti ganny fer lo ki mannyer nou ti kapab fer sa deba, sa sesyon deroule pou rankontre tou bann protokol Lasanble. E enn bann sizesyon se ki nou permit *Leader* Lopozisyon pou fer en *statement*. E se avek sa lespri ki mon'n akord li sa loportinite e mon krwar *Leader of Government Business* ti dakor avek sa.

Toudmenm si *Leader of Government Business* i oule dir de laliny pou nou terminen? Onorab ou le?

HON BERNARD GEORGES

Mersi Mr Speaker. Mr Speaker, annefe ou'n vwar mon pa'n demann okenn kestyon. Mon ti anba lenpresyon ki sa de parol ti pou ganny fer a lafen e pa bomaten e ki se Onorab *Leader* Lopozisyon ki ti pou annan dernyen parol bomaten. Se pour sa rezon, ki mon'n les lezot

dimoun demann kestyon mon pa'n entervenir ditou bomaten.

Me mersi ki ou'n donn mwan loportinite pou dir 2 mo lo lapar Gouvernman, malgre ki nou annan isi ozordi son Vis-Prezidan avek Minis Finans.

Mon ti anvi zis Mr Speaker, briyevman revwar en pti pe sa 3 gran laliny ki Prezidan ti koz lo la yer swar. E tous ankor briyevman enn de bann pwen ki'n fer resorti ozordi, me ki mon krwar pa ti a mal pou nou anmar zot dan en fason en pti pe pli detaye.

Dan son ladres Prezidan in koz annefe lo 3 gran keksoz. Enn se redwir depans, lot se lasistans ki pei pe gannyen oubyen ki bezwen gannyen e trwazyenmman se restriktirasyon serten servis Gouvernman. Dan konteks redwir depans, nou pli gro konponan ladan se sa bann depans ki nou pa kapab *afford*. E Prezidan in fer kler ki nou det i pa soutenab e nou lekonomi i dan en tre gran problem.

Bomaten mon'n ekout bann Manm eksprim serten konsern lo lefe ki pa pou annan en 13enm mwan saler e serten propozisyon in ganny fer. Me mon krwar ki nou devret *bold* e dir klerman ki ler nou pa kapab *afford* en keksoz, i pa en kestyon pa kapab *afford* R100

parey ler ou pas dan ou distrik enn ou bann dimoun i dir ou,

“*Chief* donn mwan R100.”

Ou dir li,

” Be mon napa en sou lo mwan.” I dir ou,

“Be kantmenm R25?”

Si ou napa en sou, ni R25 ou pa pou kapab. Alors sa propozisyon ki olye pa pey tou dimoun 13enm mwan, nou sey rode ki mannyer nou kapab pey en pe, mon krwar i montre ki nou pa’n vreman konpran gravite nou sityasyon. Kot si ou pa kapab *afford* pou pey R500 milyon, aköz ou pa kapab *afford* pou pey R1milyon, Pa vo lapenn ou sey dir an ou pey 10 poursan. Annou pey 40 milyon, annou pey 50milyon.

Mon krwar nou bezwen konpran sa problenm kot nou ete e ansanm koman en Lasanble, koman en aksyon fer sa pa ki nou bezwen fer, pou ki en zour parey Minis Finans fek dir nou bomaten, ler nou a sorti dan sa problenm, e nou pou sorti dan sa problenm avek bann mezir ki pe ganny met an plas. Nou ava retourn a en anormalite non selman *COVID* me a en anormalite ekonomik osi.

Mon pa a tarde aköz letan i kont nou, mon pa pou abord bann lezot size redwir depans

tel parey ferm 3 Lanbasad. E la mon pa ti ava kontan fer en pti propozisyon ki si mon ti’n demann en kestyon, mon ti a demande. E sa se demann avek Gouvernman, revwar si nou pa kapab mentenir pa en Lanbasad, pa en *Chargé D’Affaire*, pa en biro *Genève*, me *at least* annan en serten prezans menm si sa prezans i pa pou *Genève* li menm. Aköz parey nou konnen *Genève* i annan plizyer lenstitisyon enternasyonal enportan parey *WIPO*, *WTO*, *WHO*, *United Nation Human Rights Commission*, eksetera, eksetera. E ti ava byen annan kantmenm en serten prezans laba.

Hypermarket avek *review FA4JR* mon pa bezwen koz lo la.

Lasistans mon pa bezwen koz lo la, sa se dezyenm konponan. Mon krwar sa pwen in fini ganny fer atraver negosyasyon avek *IMF*, pou anmenn nou lo en soustenabilite ekonomik, e bann donasyon ki nou’n gannyen avek bann lenstitisyon *friendly* avek nou.

Me mon ti a kontan avek ou permisyon Mr Speaker, pas 1 minit koz lo trwazyenm konponan ki restriktirasyon. Aköz la osi mon krwar ki nou pa pe fer nou devwar eksplik byen

avek bann dimoun laba deor, ki mannyer sa restriktirasyon lo nivo *DA* avek *MNA* dan distrik i pou arive.

E mon konpran ki sa pwen in bezwen *raise* la akoz Prezidan ti bezwen dir nou avan Zanvye, ki pa pou annan eleksyon Konsey Distrik. Si non i ti avan esper ziska ler i vin fer Leta Lanasyon, mon mazine pou li vin eksplik nou sa.

Mon pa oule pas letan lo koz lo *forex* pou lenportasyon veikil, mon krwar sa pwen in ganny fer, me mon krwar lo *DA*, i tre enportan pou nou fer konpran, non selman bann dimoun deor, me nou prop lekor osi ki, *delinking* avek *relinking* i nepli en size ki nou devret pe aborde ozordi.

Delinking ti arive akoz pandan dezyenm repiblik parti o pouvwar avek Gouvernman ti *one and the same*. Se pour sa rezon ki ler nou'n anvi trwazyenm Repiblik, ti bezwen annan sa *delinking*.

Ozordi nou'n avri en demokrasi matir apre 30an e nou'n fek fer laprev sa matirite sa demokrasi dan nou dernyen eleksyon, kot sa size i nepli en size topik. Akoz si ou anvi travay avek ou *DA*, ou pa bezwen dan son Ladministrasyon Distrik. Ou

kapab fer sa *linking* dan plizyer lezot fason parey nou vwar in arive ler dan bann distrik kot en *DA* e *MNA* zot tou lede zot sorti dan menm parti politik, presizeman dan sa enn ki ti o Gouvernman ziska 24 zour pase.

Alor i pa en kestyon kote ou pou ete, ki pou fer ou *link* oubyen pa *link*. Me i sa lapros parey Prezidan in fer konpran kot ou pou tir politik dan travay distrik. Kot ou pou fer sa dimoun ki'n ganny elekte, ek sa dimoun ki'n ganny selekte par en *panel* ler in fer en laplikasyon, travay ansanm pou byennet zot distrik. Akoz travay ansanm zot bezwen fer.

Nou nepli kapab annan en sistenm kot dan serten ka *DA* avek *MNA* i travay byen ansanm, e dan serten lezot ka, sakenn i tir dan son prop direksyon. Mon krwar se sa ki Prezidan i anvi eliminen, e nou tou mon krwar nou annan en devwar pou nou bezwen fer sa.

Alors vwala Mr Speaker, mon remersye ou pou ki ou'n donn mwan sa loportinite pou fer sa detrwa pti presizyon bomaten. E mon swete ki nou tou nou ava konpran laliny dan lekel nou Prezidan i anvi nou ale, pou sa peryod ki pe vini. Mersi bokou.

MR SPEAKER

Mersi bokou Onorab e mersi bokou tou bann Onorab. E ankor enn fwa Vis-Prezidan, Minis e son *PS*. Avek sa nou ava *adjourn* e nou a fer *ABC* 1er. *Adjourn*.

(ADJOURNMENT)